

摘藻堂四庫全書薈要

集部

欽定四庫全書薈要卷一萬四千四百九十三

集部

宛陵集卷五十三

宋 梅堯臣 撰

送王介甫知毘陵

吳牛常畏熱吳田常畏枯有樹不蔭犢有水不滋稌孰  
知事春農但知急秋租太守追縣官堂上怒奮鬚縣官  
促里長堂下鞭扑俱不體天子仁不恤黔首逋借問彼  
為政一一何所殊今君請郡去預喜民將蘇每觀二千

石結束辭國都絲韉加錦緣銀勒以金塗兵吏擁後隊  
劍撾盛前驅君又不若此草轡障泥烏歟行問風俗低  
意騎更駕下情靡不達畧細舉其麤曾肯為衆異亦罔  
為世趨學詩聞已熟愛崇理豈無

送曾子固蘇軾

屈宋出於楚王馬出於蜀荀楊亦二國自接大儒躅各  
去百數年高下非近局鉤陳豹尾科登俊何炳緝楚蜀  
得曾蘇超然皆絕足父子兄弟間光輝自聯屬古何相

遼闊今何相邇續朝廷有巨公講索無遺錄正如唐虞  
時元凱同啓沃何言五百載此論不可告二君從茲歸  
名價同驚俗

送建州通判沈太博

昔聞醉翁吟是沈夫子所作今聽醉翁吟是沈夫子所  
彈聲如冰澌下石灘嚼齧碎玉遶齒寒四座整衣容色  
端醉翁雖醉無慢官其音正以樂其俗便且安何害醕  
酌顏渥丹沈夫子邂逅相遇必已歡玉琴能寫人肺肝



人所為難君不難平明解船建谿去輕賫快意不長湍  
谿東白茗象月團來奉至尊龍屈盤餘為帶銬與轡片  
散在六合雲漫漫况君五臟清如水宜飲沆瀣采木蘭  
更留瓦硯贈我看鄴宮鴛鴦誰刻刻

送王平甫擬離騷

識君兮不早君尚少兮我老蘭與蕙兮多薰塞雜佩兮  
芳芬蘭條往兮蕙隨心俯仰兮徘徊與識吳兮吳樂嘗  
適楚兮楚悅君何為兮我閤麒麟繫兮不馳鳳皇蔽兮

挑達均莫悲兮別離悵公子兮何之絕大江兮無波奉  
赤鯉兮藉荷芰蓂符兮陳羹親意得兮忘榮世反是兮  
從貴聊送君兮傷情

送僧遊廬山

欲遊廬山去將託楚舸稍暮行長河曲月上黃公坳悠  
悠幾千里身世非繫匏恣觀瀑布虹不畏潯陽蛟誦經  
東林下小宇結香茅

韓持國再遺洛中斑竹笋

牡丹開盡桃花紅斑筍迸林犀角豐兩株遠寄川上鴻  
韓郎輟口贈楚翁便令剝錦煮荆玉甘脆不道簞瓢空  
小謝舊城昭亭下侵天笙竹谿西東塘螂生後出芽茁  
羅列滿地爭強雄是時楚翁所食寡朝飯暮飯唯其充  
今來得此謂過分一貴一賤物苟同

送僧惠思

大車高馬塵塞軌弄石洗泉人不喜慨然擺落還吳都  
歸心勁於弦上矢強弩發復開矢往不可迴常應笑驚

子時能海邊來

送魯玉太博挽詞三首

射策志何遠闔棺人共疑  
莫觴朋友去泣血母兄悲  
霧氣窓間盡車聲戶外知  
玉樓成作記此語可能欺  
自昔稱王謝于今亦盛門  
尚看珠樹秀應見玉麟存  
書史辛勤學文章苦死論  
都然莫施設恨向九原吞  
試問於天下誰從百歲心  
短長從所盡禍福乃相尋  
只以名賓實卹論古至今  
未能忘物境空復歎人琴

蘇明允木山

空山枯楠大蔽牛霹靂夜落魚鳧洲魚鳧水射幾千秋  
蠹肌爛隨沙蕩流唯存堅骨蛟龍鋏形如三山中雄酋  
左右兩峰相挾翊尊奉君長無慢尤蘇夫子見之驚且  
異買於溪叟憑貂裘因嗟大不為梁棟又歎殘不為薪  
栢雨侵蘚澁得石瘦宜與夫子歸隱丘

哀國子黃助教

儒者務欲博誦說窮冬秋衣裙未及解含珠以見求閩

稱黃夫子常恐學不流有徒如浮萍匝匝圍剗舟聚書  
將萬卷載行無馬牛去年來京師滿篋分寄投半在吳  
楚間半入趙衛陬昨日大官薦青袍變綈裘今朝為異  
物寸祿與命讎獨聞邯鄲公哀之使歛收曷其稟賦薄  
安得被王侯旅殯欲焉託定將塋何州生為四方遊死  
當不擇丘豈必歸故鄉萬里過山頭

沅江李氏書堂

船從洞庭來非賈即遊宦宦賈事風檣誰能樂清晏不

如蓄書史萬古無與間上觀堯舜仁下覽魏晉篡善惡  
彼既殊智巧徒以辨君心於此得用捨不自慢堂中羅  
高厨戶外望鳴鴈菰菱可采掇魚鼈可釣汕卒歲身多  
餘世俗莫習慣

張堯夫寺丞改葬挽詞三首

洛陽交舊裏過半已凋殘在昔義投漆最先悲闔棺誰  
知二紀水重卜九原安聞說塞門路白楊風更寒  
當時嗟遽沒二子未能言頻歲折丹桂買塋遷陸渾重

銘太史筆不替故人思為善有終慶此焉天意存  
舊墳為澗齧新冢得山深斬木來荒路移松出近岑黃  
鸝啼棘上玉女問泉音強作挽人唱儻知哀感心

讀黃節推卷

磊落黃從事清吟古氣多少年知任俠欲老解登科辨  
起公卿坐時為慷慨歌又持珠玉贈將柰老貧何

得陳天常屯田斑筇竹二枝

客初西蜀來遺我雙筇竹上有紅淚斑斷非湘娥哭嘗



聞帝魂哀嚎血滴草木春露灑更新殷痕侵粉綠截為  
扶衰杖萬里出洛谷今來入我手君勤意有囑區區四  
十年重趼生兩足冠巾三男子且與詩書讀翁雖文章  
窮尚以字遮目忍弃不以教携歸事樵牧故茲九節贈  
用助老追逐楊朱非為岐賈誼非為鵬及其悲慟時豈  
不沾盈掬揮之儻着物無迹染林麓因持此竹紋勿歎  
前人獨

送余少卿知睦州

青山峽裏桐廬郡七里灘頭太守船  
雲霧未開藏宿鳥坡原將近見燒田  
養茶摘藥新春後種橘收包小雪前  
民事蕭條官政簡家書時問雪溪邊

夜直廣文有感寄曾子固

日暮蛛絲動月暗螢火明  
方茲步庭戶浩然懷友生  
友生將東歸泛若赴海鯨  
已從龍門出不慕朱鼈輕  
朱鼈過吳洲飛飛就東瀛  
沉浮未可問名有萬里程  
須憂小水魴勞勞將尾頰

重送曾子固

楚澤多年一卧龍  
新春雷雨起鱗蹤  
誰知天上爭騰躍  
偶落池中雜唵喁  
且自摧藏隨浪去  
何當駕馭使雲從  
劉累只說古來有  
暫屈泥蟠莫便慵

寄題沈比部江州齊雲樓

遠目不高不可極  
朱樓要與浮雲齊  
江流萬古平決莽  
山雨一過寒淒淒  
賈客檣下望吹笛  
漁郎浦前看斷霓  
欽飛射蛟水花伏  
高士種柳煙條低  
羣鴈有時至自北

洪潮到此不更西  
君家隱侯有八詠  
風雅未盡留人題  
雲間月

明明雲間月皎皎  
莫可指雄鳥與牡  
兔萬歲不生子三  
旬後乃合徒用成  
甲癸焉見下土物  
長養各私已蛇蝎  
滿窟隙嗣毒自未  
已天地豈有意盛  
德名不死

依韻和梅龍圖觀小錄

四百鸞皇羽翼成  
高低輕重出權衡  
他時俱作公卿去  
誇是王家門下生

送鮮于祕丞佺通判黔州

壺頭山下俗已婦曲中聽汲井熬鹽白燒田種穀青巖  
風來虎嘯江雨過龍腥事簡能談者揚雄所草經

依韻閩中孚職方暴雨幸涼

天津赫日欲焦拆西北風來斗減威太帝宮庭無暑入  
大明冠佩退朝歸泠泠冷襲瑠璃簾奕奕涼翻翡翠幃  
交扇不須煩素手淋漓誰復汗頻揮

愛月

終夜每愛月見月常苦稀不雨即雲晦何能藉光輝儻  
有一夕明豈畏露濕衣素娥領玉兔孤寡命亦微堂堂  
罕開耀多是半掩扉曾負萬家望空似隨人歸一歲復  
一歲白髮思釣磯

呂縉叔云永嘉僧希用隱居能談史漢書講說邀  
余寄之

柰苑談經者蘭臺著作稱吾儒不兼習爾學若多能每  
愛前峰好閒穿弊屐登定將修史筆添傳入高僧

依韻和王景彝馬上忽見槐花

六月御溝馳道間青槐花上夏雲山  
退朝側帽驚時晚近樹聞香暗詠閒  
新雨賈生車喜出舊年潘岳鬢添斑  
老慙太學無經術空飽虀鹽強往還

送家靜寺丞知洛南

秦愛商於地信美洛水南銀鈎與丹砂  
鑿山民爭貪蜀客善製錦當先務桑蠶  
衣老以及少使煦如春酣摘蔬有筍蕨  
釣庖有巖潭頗同故鄉味將喜獲所諳

和王景彝省中詠孤竹

愛此孤生竹，碧葉琅玕柯。結根甘泉裏，豈必泰山阿。曾  
莫學兔絲徒，以附女蘿風。迴掃庭戶夜，月誰與過。

永叔內翰遺李太博家新生鴨腳

北人見鴨腳，南人見胡桃。識內不識外，疑若橡栗韜。鴨  
腳類綠李，其名因葉高。吾鄉宣城郡，每以此為勞。種樹  
三十年，結子防山獠。剥核手無膚，持置宮省曹。今喜生  
都下，薦酒壓葡萄。初聞帝苑夸，又復主第褒。纍纍誰採



掇玉椀上金螭金螭文章宗分贈我已叨豈無異鄉感  
感此微物遭一世走塵土鬢顛得霜毛

陸子履示秦篆寶

其文曰二十六年皇帝盡并兼天下諸侯黔首大安號為皇帝

乃詔丞相斯館法度量則  
不一嫌疑者皆明一之

秦既并諸侯斯乃一度量鑄寶以永傳萬世俾勿喪精  
銅不生花小篆著丞相一沒咸陽宮千秋事更王陸君  
居洛城客有來渭上曰因農人耕發壞破古藏遂獲此  
物還文完字何壯始號為皇帝立語已超曠意將愚黔

首轡起危博浪其後同玉璽不隨驪山葬今蓄於君家  
徒爾資竒尚物以用為珍異時皆似妄

王屋高送王屋知縣孫祕丞

王屋山高無猿獮下有黃河水滔滔天壇半夜見海白  
光動古邑雞先鳴雞先鳴絕吠藝巖居林栖吏莫搔山  
膚有時得虞獵不比羝肉烹連毛聞君今去將效陶縣  
前種柳芟蓬蒿不問公田問民俗民安事簡教兒曹河  
南太守喜愷悌如此可以無厭勞

聽文都知吹簫

晏虞部遣  
求一見之

虞舜已去蒼梧野秦女駢鸞無復下簫管人間不解傳  
帝樂部中能亦寡欲買小鬟試教之教坊供奉誰知者  
晏識文公始致來勸接賤生宜強且乃呼側坐吹一曲  
驚顧頓嘶堂下馬吾妻閨中聞不聞稚女扳簾笑嬌妣  
未敢多聽便遣還贈飲單盃向身瀉

雜言送王無咎及第後授江都尉先歸建昌

白袍來黃綬迴來跨蹇驢迴跨馬麻源三谷桂花開江

都作尉入風埃主人劉向西京才心如明月無不照恐  
君已到還鸞臺

宛陵集卷五十三

謹案卷五十一第十頁前五行既衰愈懶身到遲  
刊本袁詵裏據宋詩鈔改

第十二頁前一行苑樹暗添花刊本苑詵花據別  
本改

第十二頁前三行明日聖俞若無詩刊本詩詵書  
據別本改

卷五十二第五頁後三行已是瓊林芳草晚按宋  
詩鈔草作并

卷五十三第一頁前五行有水不滋稌按宋文鑑


滋作漑

第一頁後二行款行問風俗按宋文鑑款作徐

第一頁後三行低意騎更駑按宋文鑑騎更作撫

疲





總校官庶吉士 臣張能照

校對官庶吉士 臣戴心亨

謄錄監生 臣瞿秉虔



欽定四庫全書薈要

集部

宛陵集卷五十四至  
七

詳校官助教臣常循



欽定四庫全書蒼雪要卷一萬四千四百九十四

集部

宛陵集卷五十四

宋 梅堯臣 撰

依韻和王景彝憶秋

隴首欲看飛去雲  
槎頭安得卷輕輪  
流烏不轉西邊日

乘馬猶知果下人  
空渴魏臺冰在井  
從悲楚客淚緣巾  
炎炎赫日偏憎老  
眼耳昏聾半塞塵

七夕永叔內翰遺鄭州新酒  
言值內直不暇相邀

詰朝持鄭醞向夕望星津俗意願添巧古心思變淳予  
窮少陵老公似謫僊人獨對金鸞月宮詞付小臣

依韻和永叔久在病告近方赴直道懷見寄二章  
浴堂深殿近皇居秋夕詞臣直宿初宮女穿針爭落月  
官奴持燭看殘書萬家乞巧心無盡斜漢飛光望有餘  
枕上江山夢猶熟五更寒雨過簾疎

玉轡瓏瓏出絳宮青槐馳道曉煙中塵頭尚裛洗車雨  
馬耳前趨吹鬣風聞說自將身許國不須仍以醉為公

我今才薄都無用六十棲棲未歎窮

文豹篇贈黃介夫

壯哉南山豹不畏白額虎澤霧毛雖雜鼪鼠朝將具鬚  
暮為乳文章子雲久已許還笑大夫費五穀天子仗中  
儀勿舉尾與旗常願看取

送韓欽聖學士京西提刑

王朝慎常刑恐民陷非辟分命遣使車謬枉得舉摘兼  
之勸農桑欲野無曠隙韓侯夙所志功利豈止百茫茫

唐鄧間荒土無牛跡邵閼廢未久柘陽仍舊白二地倘  
復營萬世不可易昔在漢家時近親多占籍苟或非膏  
腴當應徙畿赤每念輒歎嗟未能俾盡畫天將富斯民  
事與願不隔其易謂何如拾芥由琥珀我今送韓侯書  
以贈無責

送陸子履學士通判宿州

雷雨初過草木新汴堤楊柳綠陰勻已看畫舸逐流水  
不惜長條折與人淮境秋傳螭螯美郡齋涼愛蟻醅醇

睢南莫久留才子宣室歸來問鬼神

得福州蔡君謨密學書并茶

薛老大字留山峰百尺倒插非人踪其下長樂太守書  
矯然變怪神淵龍薛老誰何果有意千古乃與奇筆逢  
太守姓出東漢邕名齊晉魏王與鍾尺題寄我憐衰翁  
刮青茗籠藤纏封紙中七十有一字丹砂鐵顆攢芙蓉  
光照陋室恐飛去鑱以漆篋緘重重茶開片銛碾玉白  
亭午一啜驅昏慵顏生枕肱飲瓢水韓子飯糞居辟雍

雖窮且老不媿昔遠荷好事紓情悰

韓子華吳長文石昌言三舍人見訪

當時載酒客共過草玄人今日一寒士能來三侍臣竹  
門容大馬金絡照諸隣雞瘦莫為具阮家依舊貧

送吉老學士兩浙提刑

重本恤刑天子聖舟車持詔使臣賢部中漢吏無冤獄  
對上吳人益美田重過故鄉逢父老一聞鳴鶴記山川  
不須歌管唯詩酒況有餘杭白樂天

永叔內翰見訪

七月二十六日

內相能來顧為郎樂有餘兒童爭拂榻門巷劣容車掩  
扇知秋意窺牆省舊書經年三枉駕未與故人疎

送石昌言舍人還蜀拜掃

紫微星宿何煌煌掖垣華閣上相當舍人亦與泰階近  
兩兩聯裾如鴈行其間飛星入玉壘天子賜告歸故鄉  
錦韉金轡照棧去文園渴令難可望揚雄位卑纔執戟  
豈有爵祿多文章石公官顯職且貴還家展墓酌椒漿



太守趨塵里人避岷山松栢風淒涼椎牛行酒與耆舊  
耆舊醉歸呼此郎公置名分共其樂敦厚世俗時陶唐  
郎呼只作曩日視安知鏘玉侍明光歸來却向鳳池直  
詔言一出稱廟堂廟堂蕭曹不草草潤色鼓動辭琅琅  
黿頭蓬萊便可到蜀人更賀烹猪羊

送劉元忠學士還南京

昔見相公登瀛洲今見公子為校讐鯤鵬變化三千載  
我生安得不白頭君前拜恩父前慶暫向南都乘順流

南都留守頗為喜將吏入賀靴聲道酒與銀瓮羊臠炙  
上下和煦移涼秋歸來却上柳堤路西風健馬控花虬  
送潤州通判李屯田

過江始與風沙隔京口山連北固牢刺史丰儀於體重  
邦人全伏此名高宴盤紫蟹方多味古寺青林不厭遨  
定挈傳家舊圖籍漕河應莫費吳艘

寄題知儀州太保蒲中書齋

中條插遠近黃河瀉直斜蒲坂之城在其涯渠渠碧瓦

十萬家官商工農各擾擾侯獨理齋窓照紗侯方守邊  
聽胡笳滿屋蓄書凡幾車他年不按清商樂亦莫學種  
東陵瓜老繫戰馬向庭下厨架整娖齊籤牙朝聞鳴雞  
夕聞鷄眼昏秋匣生銅花兒孫誦習且盈耳客來休論  
常山虵

哭孫明復殿丞三首

魯國先生歿夷門吉士哀因讒君席遠時賻帝恩該寂  
寞蒿宮啟悠揚茜旒迴昔賢皆不免松下作寒灰

舊業居東岱中年謁紫庭要塗無往跡至死守殘經詔  
許求遺藁朋隣與墓銘世人無怪我涕淚為之零  
自古春秋學皆知不可過生前恩禮少歿後薦章多妻  
子將焉託田園有幾何汶陽秋樹裏黃鳥謾聽歌

程文簡公挽詞三首

嘗預巖廊政終為社稷臣作藩安舊俗飲酒得賢人塋  
禮饒簫咽明儀幣馬陳泉堂一經掩原上只麒麟  
將相榮難及唐虞世已遭名將官愈大節固位同高哀

悼王朝輟鑄埋史筆操空山伊水外松栢冷蕭騷  
闕塞秋雲冷伊川苦霧陰薤歌金鐸碎蒿里石宮深燃  
漆為長夜栽松作茂林空留舊冠劍家廟四時心

送李殿丞通判蜀州

嘗聞蜀國海棠盛因送李侯宜有詩日愛西湖照空錦  
醉看春雨洗燕脂郡無公事中園樂民喜羣邀匝樹窺  
望帝鳥啼空有血相如人恨不同時晨鮮深淺非由染  
解賦才華未得知聞說趙高今已老試教圖畫兩三枝

八月十夜廣文直聞永叔內當

聞向蓬萊嶺鰲峰第幾層秋聲暗葉雨殘夢空堂燈推  
枕感孤鴈抽琴彈壞陵誰知廣文直桃簟冷於冰

和公儀龍圖新居栽竹二首

八月竹根移要雨逢陰便向阮家求請公靜聽蕭蕭葉  
斗變江南一夜秋

都城有地誰栽竹只見寒樗與老槐聞種琅玕向新第  
翠光秋影上屏來

贈京西陳郎中

忽枉乘輅車，鏘然響金轡。  
駐軫與我言，琅琅有深意。  
乃知故相家事業，已不墜信哉。  
渥洼種千里，可立致顯祖。  
實令君名聲，取高位。伯叔與懿考，  
聯榮重當世。于今多昆孫，  
朱紫紛曳地。勉勉崇令德，  
蘇李何難至。

送董著作知北海縣

君嘗佑王屬，議平天下刑。  
出宰得古邑，農鋤多帶經。  
素琴伴飲酒，綠蘚生訟庭。  
舉首望海鴈，高懷在青冥。

送王微之學士知池州

秋江渺然生寒潮北風吹帆上青霄旗脚舒舒戰紅鬣  
旗心閃閃交皂鵑檣下健兒發金鏡屋上鸞僮鳴紫簫  
岸傍舟人望且拜溪口直入當高譙正聞鼓角波動搖  
齊山舞翠挹峯堯郭西猛虎夜莫入太守號令如怒飈  
長戈椿爾喉長刀斷爾腰牙兵將吏無敢囂新威烈烈  
野火燒

讀永叔集古錄目



古史書不足磨璞鐫美辭周宣石鼓文已缺秦政嶧山  
字苦隳西漢都無半畫在黃初而上猶得窺下及隋唐  
莫可數奇言偉迹恐所遺信都力粘大小軸集十為秩  
仍第之隨目證訛甲癸推青編是非皆究知有益於古  
今不疑碑雖滅絕事弗移後人覽錄尚若披信都用意  
無窮期天灰地燼乃終畢信都信都名愈出

依韻和永叔秋日東城郊行

郊原物老莽然中寓興驅車向國東夾道名園迷屈曲

壓枝秋實亂青紅  
寒畦覆綠將收菜  
野蝶雙飛尚繞叢  
田父欣來問行幸  
依稀還似鬪鷄翁

送王景彞學士使北

持節共知過碣石  
銜蘆相背有飛鴻  
地寒狐腋著不暖  
沙闊馬蹄行未窮  
隴上牛羊衝密霰  
帳前徒御立酸風  
歸時莫問程多少  
却到河湟杏萼紅

哭王幾道職方三首

前罷邯鄲守孤高  
與世違青雲舊知  
在白首故園歸既

沒無兒女元貧只帳幃平生洛陽友從此更應稀  
我今過五十萬事日消磨熟識世間寡故交泉下多  
葉秋知易墮松耐竟如何嘗亦悲前哲荒墳野鼠窠

得君音信近安穩在緱山不是國醫悞寧辭蜀道艱  
終然有修短猶免歷間關便作千秋別霑襟涕淚斑

君當入西

川官雖抱病無由免待闕於緱氏  
因血國醫以藥下之乘虛而卒

依韻和楊直講九日有感

也持黃菊藥時望白衣人首肯從來厭茱萸却乍親護

霜雲不散吹帽客何貧莫要悲搖落秋花更勝春

王侍講原叔挽詞三首

衣冠今盛族蘭玉舊嘉聲博古無遺悞遭時有重名魂  
輿臨水發靈馬向郊鳴歸塋商丘外森森栢已成

稽古逢堯舜鏘金侍冕旒生員尊鄭學子舍預夔謀翰  
苑事猶著岱宗魂已遊無情是天地玉樹掩蒿丘

丹旒秋風急清笳曉月寒明衣裋草露素士挽桐棺行  
哭賓徒盛觀儀里巷殫空餘舊編在千載莫能刊

送公儀龍圖知杭州

在昔漢中徵我祖入吳門公今領名都千騎擁高軒與  
古異出處素節古本原江觀白馬潮水花長鯨奔山飄  
月桂子天香一國繁壯奇已若此纖侈尚亦存舊聞其  
風俗色易而柔溫太守朝駕車閭巷焚蘭蓀太守暮還  
府燈燭照旗旛清歌延冠蓋廣湖浮酒樽成都與餘杭  
天下莫比論彼為公故鄉此為公偃藩吏民宜寡事愷  
悌有謠言

和楊直講夾竹花圖

桃花天紅竹淨綠春風相間連溪谷花留蜂蝶竹有禽  
三月江南看不足徐熙下筆能逼真鹽素畫成纔六幅  
萼繁葉密有向背枝瘦節疎有直曲年深粉剝見墨蹤  
描寫工夫始驚俗從初李氏國破亡圖書散入公侯族  
公侯三世多衰微竊貿擔頭由婢僕太學楊君固甚貧  
直緣識別爭來鬻朝質綈袍暮質琴不憂明日鐫無粥  
裝成如得驪頷珠誰能更問龍牙軸竹真似竹桃似桃

不待生春長在目

送李端明知河中府

才業人終服聰明帝所聞  
來希段干木去識大馮君  
金絡鳴津口朱旗點鴈羣  
山河虞舊國簫鼓漢橫汾  
古堞臨秋月高樓等白雲  
應同羊叔子緩帶隔囂氛

依韻和永叔內翰西齋手植菊花過節始開偶書  
見寄

晝惜日易沉夜惜月易曉  
重陽種菊花此意爾大好所

嗟時節晚又失澆培早開榮獨是遲造化徒費巧霜前  
擁繁萼籬下同隕槁微根發再綠復笑王孫草莊生語  
鵬鷖樂不計大小能齊乃有餘但恐知者少常愛阮嗣  
宗遇酒醉則倒杯中得賢趣世上逐金裊

依韻和丁學士陪諸公城東飲

黃花秋草滿荒臺聯馬鳴珂未欲迴上苑自將馳道隔  
高林空望白雲開薦肴已去紗籠罽賜醞新從蟻甕來  
天氣正清風景好重門雖禁不辭杯



宛陵集卷五十四

欽定四庫全書薈要卷一萬四千四百九十五

集部

宛陵集卷五十五

宋 梅堯臣 撰

依韻和池守王微之訪別

君榮初出守我老未東歸  
病眼生花早蒼毛似葉稀  
往還從更少談笑暫相依  
不及秋鴻翼能隨向楚飛

寄題資州錢固秀才道勝堂

醮壇舊山下高卧一儒生  
有室羅經籍無心取組纓  
芋

肥收歲計柑熟摘霜晴暫向京都見添書入蜀城

送黃國博知撫州

緘

逆水乘風上蒲帆滿挂檣日行知幾里江渺不分疆宿  
浦隨潮入逢人問路長臨川十萬戶勸勞執壺漿

觀韓王汝胡人貢奉圖

時世重古不重新破圖誰畫舊胡人臂鷹捧盤犀利水  
鐵鎖獅子同麒麟翹翹雉尾插頭上深目鉅鼻青搭巾  
塗朱點綠筆畫大筋骨怒露蠻祠神茜袍白馬韓公子

從何得此來秘珍定應海客遠為贈中國未覩難擬倫  
公子自言吳生筆吳筆精勁瘦且勻我恐非是不敢贊  
退歸書此任從嗔

送韓文饒贊善宰河南

退之曾作河南宰韓氏于今又見君縣政從來人有望  
家聲不墜世多文後池分洛貯藍水高檻看嵩迷嶺雲  
主簿堂前七葉樹手栽應莫已剗焚

送刁秘校授漣水主簿歸四明省親

桂得嫦娥枝婦得黃姑女直歸東海頭翁嫗笑相語何  
當却之官古縣入平楚莫嫌簿書繁百事由區處

依韻和永叔戲作

琵琶轉撥聲繁促學作饑禽啄寒木木蠹生蟲細穴深  
長啄敲鏗未充腹攏弦疊響入衆耳發自深林答空谷  
上弦急逼下弦清正如螳螂捕蟬聲坐中賓歡呼酒飲  
門外客疑將欲行主人語客客莫去彈到古樹裂丁丁  
內賓外客曾未聽乍聞此曲無不驚還憶昭君入胡虜

烏孫帳下邊馬鳴安知如今有樂事能使女奚飛玉觥  
女奚年小殊流俗十月單衣體生粟言事關西楊廣文  
廣文空腹貪教曲曲奇譜新偷法部妙在取音時轉軸  
翰林先生多所知又笑畫圖收滿屋不肯那錢買珠翠  
任從堆插堦前菊功曹時借乃許出他日求觀龜殼縮  
我嗟老鈍不如渠幸得交朋時借娛但樂休計有與無  
送吳仲庶殿院使北

漢朝重結單于好歲遣名臣禮數增紫鼠皮裘從去着

飛龍廐馬借來乘天寒將遇磧中雪鼻息暗添髭上冰  
定見南鴻起歸思家書欲寄不堪憑

送呂沖之司諫使北

北人多竊朝廷禮譯者交傳應對辭羊酪調羹尊漢使  
羶堂舉酒見關氏矇矇白日穿雲出漭漭黃沙作霧吹  
知去燕京幾千里胡笳亂動月明時

送孫隱之都官通判秀州

柳條初落盡不折意徘徊泛汴趨殘水到吳看早梅無

耽聽鶴唳有信寄鴻來聞說閭亭改靈光化劫灰

依韻和王平甫見寄

兄為太守兩輪朱仲泛吳人燕尾艫且看洞庭多橘柚  
莫懷江國有枌榆少遊山水殊非俗老愛詩書又似愚  
百事輸君休問我風沙不比在雲湖

得王介甫常州書

斜封一幅竹膜紙上有文字十七行字如瘦棘攢黑刺  
文如溫玉爛虹光別時春風吹榆莢及此已變蒹葭霜



道途與弟奉親樂後各失子懷悲傷到郡紛然因事物  
舊守數易承蔽藏搜姦證繆若治絮蚤虱盡去煩爨湯  
事成條舉作書尺不肯勞人魚腹將魚沉魚浮任所適  
偶能及我為非常勤勤問我詩小傳國風纔畢葛屨章  
昔時許我到聖處且避俗子多形相未即寄去慎勿怪  
他時不惜傾箱囊知君亦欲此從事君智自可施廟堂  
何故區區守黃卷蠹魚尚恥親芸香我今正值鴈南翔  
報書與君倒肺腸直須趁此筋力强炊粳烹鱸加桂薑

洞庭綠橘包甘漿舊楚黃橙綿作瓢東山故游携舞娘  
不飲學舉黃金觴谿如罨畫水泱泱刺船靜入白鷺傍  
菱葉已枯鏡面涼月色飛上白石牀坐看魚躍散星芒  
左右寂寂夜何長烏棲古曲傳吳王千年萬年歌未央  
莫作腐儒針膏肓莫作健吏繩餓狼儻如龔遂勸農桑  
儻如黃霸致鳳皇來不來亦莫愛嘉祥

司馬君實遺甘草杖

美草將為杖孤生馬嶺危難從荷篠叟寧入化龍陂去

與秦人采來扶楚客  
衰藥中稱國老  
我懶豈能醫

逢雷太簡殿丞

長安初見君君頷微有鬚  
後於河內逢秀峻  
美髯胡又會在桐鄉  
談詩多孟盧  
學書得天然  
鍾王不能奴  
荏苒三十載邂逅遇京都  
朝接北扉飯暮應西垣呼  
坐中如夢寐相語故人無  
昔由處士召胃懷開廟謨  
今看髭已白議論恥非夫  
拜章陳時事皆與相意符  
其識固不淺其用當亦殊  
人多惜老大我復歎羈孤  
終朝重相笑為

君傾酒壺

雷太簡遺蜀鞭

蜀道山之峭壁兮如快刀一削平無痕其間春雷驚龍  
走竹根迸石垂虺尾骨節瘦密風霜吞野夫采之絕懸  
蔓分寸脫死持還奔他人不可得此物乃重太守公侯  
孫獻來一錢不肯要只吃斗酒抱歸村太守立性豈諂  
貴將贈故人惟義存我騎瘦馬固莫稱破韉爛轡沙塵  
昏明日試執趨君門孰不怪視竊笑言

得雷大簡自製蒙頂茶

陸羽舊茶經一意重蒙頂比來惟建溪團片敵湯餅顧  
渚及陽羨又復下越茗近來江國人鷹爪夸雙井凡今  
天下品非此不覽省蜀薈久無味聲名謾馳騁因雷與  
改造帶露摘牙穎自煮至揉焙入碾只俄頃湯嫩乳花  
浮香新舌甘永初分翰林公豈數博士冷醉來不知惜  
悔許已向醒重思朋友義果決在勇猛倏然乃以贈蠟  
囊收細梗吁嗟茗與鞭二物誠不幸我貧事事無得之

似贅癭

送呂寺丞希彥邠州僉判

自有仲宣樂從軍仍近親關河歷周鄭風雪過咸秦原  
上方驅馬鞍傍忽起鶉世家傳釣玉重問渭川濱

送施司封福建提刑

命使得才臣欽刑聖主仁銅苗休問發田種去教親白  
茗出溪上紅蕉連海濱輕車莫道遠詔意重生民

江鄰幾暫來相見去後戲寄

低頭拜我蒼髯翁來如飛鳥去如風一夕共飲斗柄北  
平明已向函關東衆中舊騎跛鼈馬塞下新買連錢驄  
疾驅似逐鄧林日不肯暫住行何窮

送徐無黨歸婺州

吳蠶吐柔絲越女織美紈機杼固已勤刀尺誠獨難裁  
縫失分寸長短為損殘嘗聞仲山甫能補帝袞完袞完  
民衣足天下無苦寒徐從信都學染翦宜弃冠彼實山  
甫徒爾亦非絳剡東歸道自勝人誰故時看

依韻和永叔內翰酬寄楊州劉原甫舍人

東望淮海間恨無鴻鵠羽鴻鵠日已飛風雪歲將暮憶  
聽談老莊達生無恐懼我今齒髮疎何異樹有蠹辭別  
不必道俛仰已成故書問雖惟為夢寐則往屢乘桴思  
仲尼好勇慙季路願希隆中卧不是邀三顧二公廊廟  
才酬寄封尺素臯夔久相稱舜禹時已遇舉杯向明月  
此意聊可寓

和韓欽聖學士襄陽聞喜亭



亭欄下望漢江水淨綠無風寫鏡明日脚穿雲射洲影  
槎頭擺子出潭聲檣帆落處遠鄉思砧杵動時歸客情  
使者徘徊有佳興高吟不減謝宣城

許仲塗屯田以新詩見訪

許氏世工詩渾崇格力微獨能兼古律無不是珠璣捧  
卷光蓬室停車照竹扉陽春復高調自昔和人稀

答祖擇之惠黃雀鮓

李白勸爾莫逐炎洲翠亦莫近吳宮燕爾不聽此言禍

患今乃見吳火時雖無越羅日生變空知稻粱肥豈悟  
盃盤薦我不聞爾聲謬成先生饌咀嚼勿言非雉鴈猶  
充饒

覽顯忠上人詩

昔讀遠公傳頗聞高行僧廬山將欲雪瀑布結成冰尋  
跡數百載歷危千萬層師來笑賈島只解詠嘉陵

依韻和吳長文舍人對雪懷永叔內翰

紫禁低雲拂綺櫳西垣人憶玉堂翁  
翬髭覓句方傳詠

着樹成花尚舞空，不管因風吹塞外。  
任教飛片落杯中，曉來城郭遮無路。  
阮籍驅車莫歎窮。

送王巖夫秘校通判滑州

昔聞信都侯，嘗作畫舫齋。  
空戶兩向闌，罇席長對排。  
左顧樹若岸，右盼堵成崖。  
既無風波虞，但與物景諧。  
一從信都去，來者趣意乖。  
屋室改庫廩，花木為薪柴。  
君當訪其蹟，更葺安舊牌。  
記石儻尚在，塵土加洗揩。  
然後釀井泉，吟醉前人偕。  
寄言靈河守，高此別乘懷。

和宋次道答弟中道寄懷

陸家兄弟苦西東黃耳傳書近已通  
共歎流年同轉轂各驚華髮似飛蓬  
河冰夜合知霜勁塞霧朝開見日紅  
臘盡春來又相遠江南江北望歸鴻

元日閣門拜表遇雪呈永叔

六花隨表拜東廂庭下遙呼萬歲長  
王會圖中陳璧馬漢官儀裏濕旂常  
因風亂絮霑螭首似鵲輕毛落井床  
素髮垂冠少顏色衆人休笑老為郎

王樂道太丞立春早朝

近臣頭上黃金勝殿前拜賜東風應蓼牙疏甲簇春盤  
肉抹長絲何亘亘寬衣武卒輦至庭人歸下筋殊難稱  
我家無火甑生塵綵柳綵花空著興空著興將底為但  
願得米資晨炊不管飛雲與麥宜千官隊中身最卑五  
日一謁前疏垂

上元夕有懷韓子華閣老

一歲老一歲新年思舊年東樓嘗共望九陌聽爭先白

髮更中笑舞姝應轉妍追隨都已倦強對月明前

錢君倚學士日本刀

日本大刀色青熒魚皮帖櫛沙點星東胡腰鞘過滄海  
舶帆落越棲灣汀賣珠入市盡明月解條換酒瑠璃餅  
當壚重貨不重寶滿貫穿銅去求好會稽上吏新得名  
始將傳玩恨不早歸來天祿示朋游光芒曾射扶桑島  
坐中燭明魑撇遯呂虔不見王祥老古者文事必武備  
今人褰衣何足道千將太阿世上無拂拭共觀休懊惱

依韻和杭州梅龍圖入淮見寄

東都車馬苦飛霾  
南國桅帆喜過淮  
船背揷旗風自展  
沙頭迎浪雪相排  
白魚已薦糟增味  
紅稻新炊粟厭懷  
定似謝公吟遠岫  
錢塘應合有高齋

送周直孺秘校和州都曹

箭頭破賊棄不為  
筆端射策取桂枝  
殿前脫袍改舊色  
庭下折腰甘去時  
歷陽郡小太守  
好督郵官閒衆吏嬉  
江邊竹園啼竹雞  
竹裏種花春過遲  
東望望夫雲脚垂

煙雨隔岸風檣歌濕鴈不起沙上嘶君思歷亂如盜絲



宛陵集卷五十五

欽定四庫全書薈要卷一萬四千四百九十六

集部

宛陵集卷五十六

宋 梅堯臣 撰

送謝師厚太博通判汾州

頻官吳越飽稷稻況住南陽多水田北登太行入汾曲  
正獲穠秋風前晉人朴厚自寡訟軟炊玉粒河鱗鮮  
君方少壯齒頰健甘美不負經腹便有意南飛寄我信  
滿川鳴鴈下連連

依韻和永叔都亭館伴戲寄

去年鑠宿得聯華二月墻頭始見花  
今日都亭公感物明朝太學我辭家

送李君錫學士使契丹弔慰

昨日北朝來告哀殿門不識桃花開  
今聞君去作弔使正值鴈噪從北迴  
風捲黃雲無遠近山留白雪猶枯荻  
歸看車馬汗流沫逃暑為傳河朔杯

送邵裔長洲主簿

姑蘇城頭烏哺時長洲草綠春袍歸魯桑葉小蠶出遲  
吳田水暖牛耕肥里胥爭迎縣寮喜入門先自易綵衣  
拜親然後及王事簿書豈得長相鞭

送薛公期比部歸絳州展墓

風雨梨花殘松栢墓門晚嗣子千里駒羊腸九折坂春  
裘不畏寒行路未為遠舊來河內守父老將衣挽

送次道學士知太平州因寄曾子固

春浦楊花撩亂飛春江魴魚來正肥采石新林兒女去

茭白蒲牙艇子歸歸令煮魚不得熟已望使君船上磯  
上磯亦不待潮應爭牽篾纜泥污衣姑熟溪頭槌大鼓  
紅抹靴刀趨俯樓牙兵可擬岸傍蘆森森甲立雄南土  
更得西州謝法曹新詠定多傳樂府

依韻和劉原甫舍人揚州五題

時會堂二首

歲貢蜀岡茶似蒙  
頂茶能除疾延年

今年太守采茶來驟雨千門禁火開一意愛君思去疾  
不緣時會此中杯

雨發雷塘不起塵  
蜀崑岡上暖先春  
煙牙才吐朱輪出  
向此親封御餅新

竹西亭

結雨竹西若若川  
揚州歌吹思當年  
劉郎若向風前唱  
夢入青樓事惘然

春貢亭

夢谷浮船穩且平  
泊登岡頂看茶生  
始從官屬二三輩  
時聽春禽一兩聲

蒙谷

茗園葱蒨與山籠  
一夜春雷發舊叢  
五馬留連未能去  
土囊深處路微通

崑丘

寺即煬  
帝離宮

隋家宮殿昔初成  
不道荒涼獸迹行  
今日知來高處望  
山川興廢使人驚

送江陰簽判晁太祝

去無珠履為上賓  
進船申浦憶春申  
江田插秧鷄姑雨

絲網得魚雲母鱗  
青天折桂香未滅  
紫豉煮莼甘更新  
平時况可樂風月  
吳物信美聊前陳

送晁質夫太丞知深州

蕪菁問古亭春入饒  
陽城豆粥君王遠  
壺漿刺史迎地  
涼宜牧馬塞近慣  
調兵為寄井泉石  
老來思目明

送少卿知宣州

先歸  
雪上

汴水清明下宣城  
太守行鴨頭吳蕩  
綠燕尾楚船輕族  
本三陽重詩從小  
謝清州民還最喜  
門下舊通名



送朱表臣職方提舉運鹽

蜃竈煮溟渤航鹹播楚越官權利言盈盜販弊相汨連  
艘以轉致攪灰或沉沒雖使日鞭黥未易窮姦窟朝廷  
用朱侯提職欲無闕侯因許專畫拜跪陳其說曰臣有  
更張敢以肝膽竭荆湘嶺下城恃遠不畏罰堂堂事私  
賈渡吏遭驅突願使商自通輸金無暴猝淮江且循常  
約束備本末國用必餘資亭民無滯物事下丞相府論  
議不可拔從之東南蘇拒之財賦遏聽侯侯往施所便

黔黎活五味既和調萬里銷狂悖汴水桃花時犀舟順  
流發過淮逢絮鮎泊岸採蘆蕨挂帆趨浪頭應不勞歲  
月

依韻和李君錫學士北使見寄

行色見車馬爲之具壺觴暫辭甘泉宮遠奉左賢王蒙  
茸春裘薄匝匝金絡光唯知君命重不數沙路長魯酒  
雖入脣胡笳易迴腸歸來立螭頭言動書不忘

送張山甫秘校歸緱氏

去年來折桂今年來娶婦得意春風前還家寒食後蓬  
巷閑雞犬藤花蔭井臼緱山白醪醇重酌高堂壽

送江東轉運楊少卿

世言楚使者乃是漢名卿曾欲察黃綬但能勤列城江  
山無改故草樹幾更榮有意息民甚不同求羨盈

宜春宴射篇李駙馬請賦雜言

風雨未過桐華時宜春苑中梨萼披天子賜宴羣臣嬉  
少年都尉方追隨暮歸遲喜聯留後兄弟雙弓射熊皮

侯宗戚族坐上少伯仲相顧驚恩私鳳凰樓高玉簫吹  
金絡駁馬不肯騎自戒危溢作後規何郎莫媿書與詩  
送王樂道太丞

相如既擊劍仲宣亦從軍二人當其時皆以能賦聞韓  
公守武垣犀兵若屯雲幄中欲寄畫才智莫有君請之  
天子所朝奏夕離羣為沽斗酒飲為買赤鯉焚魚盡酒  
亦盡醉起衣袂分

送楚屯田知扶溝

客亭多少路花信幾番風折柳贈新翠種桃思舊紅淵  
明節已異潘岳趣還同政治有餘力歸來辭賦工

呂山人同荆供奉見過

街上春泥踏始開山人忽同供奉來老奴行遲報我晚  
怒氣欲拔庭中槐聞說道心調伏久等閑休要起嫌猜  
觀劉元忠小鬟舞

桃小未開春意濃梢頭綠葉映微紅君家歌管相催急  
枝弱不勝花信風

次韻奉和永叔謝王尚書惠牡丹

大梁有公子洛陽有游俠昔時意氣相憑陵不問興亡  
事栽插栽紅插綠鬪青春春風與開春雨颺兩都富貴  
不相殊走馬尋芳何合雜只聞年少競爭先摘葉嗅花  
身更捷安知遺愛舊留守馳獻百葩心浥浥尚書最重  
歐陽公盈盤分去蜂偷獵但能為樂飲醇酒何必署名  
黃紙牒翰林職清文字稀不比外官煩應接曩公為花  
曾作譜端相用意隨蝴蝶擬王擬妃姚與魏歲歲年年

千萬葉還將顏色定高低綠珠雖美猶爲妾從來鑒裁  
主端正不藉娉婷削肩胛舊品既著新品增偏惡妬芽  
須打拉嘗憶同朋有七人每失一人淚緣睫唯我與公  
今且存無復名園共携榼公因尚書戴紅紫白髮欺公  
生匱匱磨墨揮毫興不衰作詩坐使劉曹怯副本能傳  
幸一觀口誦舌搖徒囁囁

送王郎中知江陰

持歸漢省青綾被去看吳都白馬潮  
疊鼓渡江寒浪伏

鳴鏡入境野雲飄魚穿楊柳誇鮮膾人采芙蓉學細腰  
家有二槐爲太守弟兄誰似李文饒

送閻仲孚郎中南游山水

蜀山難於上青天聞之李白爲舊傳蜀客往返曾又然  
奇峰又與三峽連巫陽神女暮爲雨飛入楚臺王夢旃  
相如揚雄不道此宋玉景差其賦偏西州才子邯鄲守  
懷章往代尚踰年家住岷峨多此宦乘閒因借下江船  
未浮洞庭沅湘去還探禹穴希馬遷春申樓觀已不見



子胥怒濤猶滿川錢塘太守同鄉里一見君來顏色喜  
甘饌香脆與君游詩貯篋囊携不起浣沙溪頭西子家  
自尋錦石菖蒲花掃歸成都與士誇君平曾已悟星槎  
次韻和永叔嘗新茶雜言

自從陸羽生人間人間相學事春茶當時採摘未甚盛  
或有高士燒竹煮泉爲世誇入山采露掇嫩紫林下不  
畏虎與蛇近年建安所出勝天下貴賤求呀呀東溪北  
苑供御餘王家葉家長白芽造成小餅若帶銚鬪浮鬪

色頂夷華味久迴甘竟日在不比苦硬令舌窄此等莫  
與北俗道只解白土和脂麻歐陽翰林最別識品第高  
下無歌斜晴明開軒碾雪末衆客共賞皆稱嘉建安太  
守置書角青翦包封來海涯清明纔過已到此正是洛  
陽人寄花兔毛紫盞自相稱清泉不必求蝦蟇石餅煎  
湯銀梗打粟粒鋪面人驚嗟詩腸久饑不禁力一吸入  
腹鳴咿哇

次韻和再拜

建溪茗株成大樹頗殊楚越所種茶先春喊山搯白萼  
亦異烏觜蜀客誇烹新鬪硬要咬盞不同飲酒爭畫蛇  
從揅至碾用盡力只取勝負相笑呀誰傳雙井與日注  
終是品格稱草芽歐陽翰林百事得精妙官職況已登  
清華昔得隴西大銅碾碾多歲久深且窳昨日寄來新  
鑿片包以籐筠纏以麻唯能賸啜任腹冷幸免酩酊冠  
弁斜人言飲多頭顫挑自欲清醒氣味嘉此病雖得優  
醉者醉來顛踣禍莫涯不願清風生兩腋但願對竹兼

對花還思退之在南方嘗說稍稍能啗墓古之賢人尚  
若此我今貧陋休相嗟公不遺舊許頻往何必絲管喧  
咬哇

送許當職方通判泉州

乳鳥不遠飛乳獸不遠遊異類尚有戀人獨安所求許  
侯恰為郡乃甘貳一州得以奉雙親時物供膳羞竹箭  
水順疾紅旗插歸舟歸舟莫苦急睢陽多舊儔丞相正  
喜士樽酒應爲留清源六千里到日魚蟹秋

宛陵集卷五十六

欽定四庫全書薈要卷一萬四千四百九十七

集部

宛陵集卷五十七

宋 梅堯臣 撰

送葛都官南歸

不羨新為赤縣尹  
惟羨暫向江南歸  
江南冪冪梅雨時  
風帆差差並鳥飛  
罾竿夾岸長若梳  
水籠畜魚鮮且肥  
家在千古溪上先  
應喜鵲噪門扉

楊樂道留飲席上客置黃紅絲頭芍藥

洛陽賣牡丹江都買芍藥賣與富人歡買為遊子樂萬

絲必同心千葉必同萼五色相淺深百金相厚薄栽培

動經年風雨便成昨蕭條洛陽城索莫江都郭賴有一

春花能無十千酌朝看門擁車暮見門羅雀嘗聞月底

人欲把月桂斫要使清光多四海意開廓我亦愛明月

常滿不願落上弦過楊侯乃值寒雨作共飲三四人

不覺傳鳴柝持葩金谷豪朱黃何灼爍還思溱洧上士與

女相謔實此香草芳請我賦其略酒闌為追詠思拙筆

屢閣

項羽

羽以匹夫勇起于隴畝中遂將五諸侯三年成霸功天下欲滅秦無不慕強雄秦滅貴以德豁達歸沛公自矜奮私智奔亡竟無終

送陳郎中知和州

藹藹尚書郎出爲二千石伯父歷將相兄弟皆烜赫前罷永嘉守民俗遮阡陌獨將海松歸夸與都下客今去



烏江邊寂寞空舊跡當求虞姬草無風舞隨拍城頭可  
曠望千里波月白俱助使君歡平時遺吏責

送薛十水部通判并州

并州自古近胡地牛酒常行十萬兵少尹曾爲五府辟  
將軍況有舊家聲桑麻故已知風俗丘隴何須訪姓名  
聞說至今猶好馬試求安穩衆中行

寄題西洛致仕張比部靜居院四堂

張侯歸靜居堂宇結四隅堂中何所有書畫羅籤厨四

堂各異名名異義亦殊夷心與會真內以道德娛清白  
及金蘭外爲子孫模西南夜落蟾東北朝生烏天門風  
相通盛衰理可無舊爾松檜樹間之花石株雨晴氣候  
佳隣里或來俱遣摘班林筍共持香粳盃飯畢循徑行  
不使僮僕扶所至舊衣坐遍歷日過晡時遇園果熟甘  
漿而粉膚就枝掇鮮美咀味銷冰酥以此樂歲月豈是  
忘形軀禮法不我棄勞吝不我紆上不媿二疏下不泛  
五湖自有逍遙趣幸世遭唐虞

送洪秘丞知大寧監

三峽蠻溪上千山楚俗兼婦人樵入市官井貨專鹽魑魅或爲患獼猴常可嫌君能厚風化男子使腰鎌

送江西轉運馮廣淵學士

五月江南行南風江惡遡乘潮雖有信不過湓城去船經香爐峰峰前須暫住三年少尹勞始得看瀑布到官未必閒舉察憂財賦迴思廬山傍塵土已生慮尚存滕王閣無忘一登顧

依韻和永叔景靈致齋見懷

翰林文字本雄強  
况復齋祠向靜坊  
高樹黃鸝無去意  
深廊朱幕動微涼  
不嗟門外塵沙苦  
只覺壺中歲月長  
庭下陰苔未教掃  
榴花紅落點青蒼

雜言送當世待制知揚州

馮

廣陵老人爭持壺酒朝  
言送少年使君暮言迎少年  
太守少年俱是玉墀人  
文章快利生銅吼  
莫作蕪城賦事  
往復何有莫聽嵇康琴  
商聲豈堪久  
今當太平非不偶

星宿煌煌羅北斗揚州古富變荒涼萬俗一心依父母  
地包淮海江湖寬貨走荆吳楚越厚開釀剗羊願遇賓  
天下沄沄不輕口

送蘇公佐屯田知單州

栢上有羣鳥一鳥飛向東方棲城頭與人司吉凶八月  
禾已穫九月黍已春競持美酒相慶樂年豐借問何能  
爾時平無困窮

王平甫惠畫水卧屏

臨流別君時，羨君觀吳潮。君行識我意，遣畫一幅綃。畫作繞床屏，滔滔隨驚飈。前浪雪花卷，後浪白馬跳。宛然千萬重，不似筆墨描。宸亞亂我目，坐卧疑動搖。夜燈照河漢，如有織女招。朝日下天窻，東海無秦橋。秦橋不可度，織女不可邀。但慕乘桴公，空能誦唐堯。嘗聞挾拓彈，意必在食鴉。終當五湖上，歸去學漁樵。

送萬州武寧段尉

希元

相見三十載，喜君始成名。新袍照江綠，白髮憎鑑明。臨

水必觀魚獨傷魚命輕朝爲淵底游暮爲釜中烹彼方  
路艱遠其民亦天氓餒之則爲盜非是惡厥生捕多勿  
夸能能在不犯兵

次韻答黃介夫七十韻

春風不擇草萬卉皆發萌盛夏一長養秋實俱與成春  
粒以蒸炊刈枯以煎烹工師調五音不問咸與黷自取  
衆律和黍谷動華英可以薦祖廟可以陳帝庭良將統  
萬卒所向若驚霆戰鬪衆益勇號令夜益明破敵必拉

朽不見堅陣橫我觀欲物際亦在農力興我觀合奏時  
亦在考擊并我觀成功日亦在間得情草木有美惡造  
化無喜憎五聲有高下一致不可評三軍用貔虎不較  
蚊睫螟大君設時網廣海無漏鯨磊落黃夫子爲學不  
自輕四十登賢科良賈售百朋得志豈計晚成名等衆  
榮舊交半存沒新知慕徒傾老鶴晴一唳隨風無近聲  
好論古今詩品藻笑鍾嶸欲掃李杜壇未審誰主盟我  
衰百事倦白首聊窮經兩目生昏花猶勝張籍盲讀書



愛日永秉扇自驅蠅但惡亂我思非與小物勅清颺  
然來喜得如弟兄散帙空堂上垂冠髮星星載誦堯舜  
篇幸今時太平不學遁世士投竿泛東溟不襲貪生人  
煉氣喻日精不羨富貴翁歌吹滿重城獨守螢火光莫  
擘蟾蜍晶人生轉頭間未免一銘旌區區逐甘鮮鼎鼎  
夸佩纓安知西山餓熟識繇上耕彼勿歎鳳衰此正歌  
鴻冥分合沒窮巷迹澀蹈高閼妻子易爲飽粟帛不足  
營豈乏一器飯豈乏一杯羹肯爲濁河濁願作清濟清

韓愈嘗有言百物皆能鳴特稱孟東野貧篋文字盈到  
死只凍餒何異埋秦阮今我已過甚日醉希步兵神僊  
多羽翼一一飛蓬瀛乃知無道氣難可強留形鄙性實  
樸鈍曾非傲公卿昔隨衆一往或值謗議騰曰我非親  
舊曰我非門生又固非賢豪安得知爾名是時聞此言  
舌直目且瞠俄然我有答賢相持權衡喜士同周公其  
德莫與京我去豈不送我往豈不迎自爲筋力寡路遠  
艱於行未若歸教子遺金徒滿籛歲月苦易得顏貌日

可驚身雖厭役役心亦遠磴磴歸思吳州橘夢憶楚江  
萍試看兩園碁白黑何所爭朝脫泥塗困暮失雲衢亨  
物理既難常達生重飛觥曾以文豹章遠喻子懷能曩  
者恃貴勢悔說烏鳥靈烏靈反見怒終恨屈此誠當時  
語頗錯盍呼爲大鵬於茲儻遇之應解頸頰頰韻盡意  
未盡且用此報瓊

永叔內翰見索謝公遊嵩書感歎希深師魯子聰  
幾道皆爲異物獨公與余二人在因作五言以叙

之

昔在洛陽時共遊銅駝陌尋花不見人前代公侯宅深  
堂鎖塵埃空壁鬪蜥蜴楸陰布苔綠野蔓纏石碧池魚  
有偷釣林鳥有巧射園隸見我來朱門暫開闢園婦見  
我還便掃車馬跡何以掃馬跡實亦畏他客我輩惟適  
情一葉未嘗摘他人或所至生菓不得惜又憶遊嵩山  
勝趣無不索各具一壺酒各蠟一雙屐登危相扶牽遇  
平相笑噓石搥雲衣輕巖裂天窻窄上飲醒心泉高顛

溜寒液下看峰半雨廣甸飛甘澤夜宿岳頂寺明月入  
戶白分吟露氣冷猛酌面易赤明朝循歸途兩脰痛若  
刺日旰就馬乘香草路迫阨却望峻極居已與天外隔  
薄暮投少林漱濯整冠幘碑觀巡幸僧指古定空壁誓  
將新詠章燈前互詆擿楊生護已短一字不肯易明年  
移河陽簿書日堆積忽得謝公書大夸遊覽劇自嵩歷  
石堂鮮花題洞額其文曰神清固非人筆畫乃知二公  
貴逆告意可賸遂由龍門歸里堠環數驛我時詩已答

或歌或辨責責我不喜僧性實未所獲凡今三十年累  
塚拱松柏唯公與非才同在不同昔昔日同少壯今且  
異肥瘠昔日同微祿今且異烜赫昔同騎破韉今控銀  
轡革昔同自謳歌今執樂指百死者誠可悲存者獨窮  
厄但比死者優貧存何所益

送謝師直秘丞通判莫州兼寄張和叔

河湟宿兵地勁勇天下聞侵疆古甚熾薄伐詩所云往  
今勢且異利害理頗分遠以塘設險遂輕甲屯雲昔傳

嘗膽國能破怒蛙軍越雖隔大江吳遭若枯焚實由恃  
阻懈抉目悲伍員夫子負美才議論高不羣況有令兄  
弟今亦貳河汾助守戒不虞慎勿倚和獯張侯爲刺史  
大族獨此君法明而不竒可共飾以文

送白秀才福州省親

士憂行不脩不憂祿不及之子久好學何患名未立聖  
時開賢科子獨不肯入固非遠仕進服菴難赴集南歸  
慰親顏道路正暑濕悠悠幾千里赤日薄行笠暫憩青

林下賴有寒泉汲漱齒去塵埃土風須漸襲

送温州楚屯田

鴈蕩山頭鴈如隨太守來秋風既與至春日定同迴上  
宰無忘舊明時必用才白於章句老經冊向螢開

送僧在已歸秀州

前歲嘉興火僧居化劫灰四方持鉢去千里渡江來心  
向王城講緣從海客迴水天聞唳鶴不復有塵埃

送祖印大師顯忠



黃紙賜祖印鑄名不鑄金力笑蘇季子責望小人深渡  
江見海月秋光上遙林團團冰玉盤瑩然如禪心

題譯經院同文軒

有書無異文有車無異軌貝多得旁行白馬來萬里清  
軒延高僧一歲譯幾紙譯罷坐焚香庭草灑寒水

和江隣幾學士得雷殿直墨竹二軸

昔見雷子之小篆今見雷子之墨竹節瘦已似蛟龍孫  
葉暗曾無鳳凰宿江翁得之尤愛憐作詩寫意酬雙軸

掛在空堂坐卧看如玩蕭蕭巖畔綠莫疑昏黑眼生花  
松煤濃色切寒鴉不問主人兼客至明朝騎馬到君家  
永叔內翰見過

我居城東隅地僻車馬少忽聞大尹來僮僕若驚鳥入  
門且坐笑豐頰光皎皎問我餐若何依舊抱糜麪問我  
詩若何亦未離纏繞我庭有藝莧不堪秣騾裏我壺無  
醪醴不能犒介紹乃喜百事稀來此與世矯固非傲不  
往心實厭擾擾

韓子華內翰見過

但見公軒過未見我馬去我嬾宜我嫌公會不我惡秋  
雨天街涼蕭蕭綠槐樹遙聽高車聲騶導門前駐僕夫  
驚入扉遽曰能來顧度量何其宏始終不改遇索以新  
詩章徧覽日欲暮誠慙兜離音唐突韶與濩明朝當負  
荆人莫譏貴附

送董察推赴江寧

金陵從事去不歎食無魚尺鯉日登俎故鄉時得書衰

荷摘短袂秋蘚曳長裾若見府公問年來懶更踈

次韻和司馬君實同錢君倚二學士見過

棲棲太學官日厭塵坌積朋游絕經過都未昧相識幸  
得養踈慵不能事役役天京二賢佐向晚忽來覲笑我  
似盧仝環然空四壁只欠長鬚奴訴尹惡少摘移榻近  
簷楹談詩俄至夕迴車閭巷隘跛馬愁所歷平明看蒼  
苔已覺生轍跡

次韻和錢君倚同司馬君實二學士見過

府僚忽方駕乃知決訟餘大尹不苛察羣吏不牽拘嘗  
稱二三賢助治無偏隅新晴乘此涼行行過我居何以  
延君子唯有滿牀書何以解君頤淡句無足娛何以留  
君久燈燭已照塗登車莫言遠騶從美且都夾道行人  
止按轡寧馳驅我老馬所羨送子立躊躇

送閬州駐泊荆供奉

青天不可上蜀道未嘗行每說褒斜險唯聞猿鳥聲去  
爲千里客自握一方兵所重恩威立無將遠戍輕

江隣幾沈文通二學士見過

東城車馬多巷無蹄與轍如何二賢豪侵晨顧衰茶喜  
言雨後涼早暮脫炎熱愛子屋室靜塵土都已絕不唯  
清耳目亦粗養愚拙江碑讀頭陀沈賦賞雌霓固知世  
德高學問冠時哲我慙於其間荆華叅蟻垤然推鵬鷁  
分自足不少別君歸邀此吟把筆強搜抉

送壽州司理張元興

清川夜流明月光城上有烏啼女墻月明不掩斗與氣

鳥啼未歸雲點霜霜寒月冷古時獄下有苔壺之雄鉞  
水方軒眉大靈智見我西北天門傍自言昔有切玉寶  
嗟今非後百鍊鋼用之補履亦何益穎脫未如錐處囊  
誰能爲封華陰土背負七星生焜煌君去味我書此意  
莫歎淮水來湯湯

宛陵集卷五十七

謹案卷五十五第二頁後五行長啄敲鏗未充腹

刊本敲鏗訛敲鑑據別本改

第四頁前一行無耽聽鶴唳刊本唳訛淚據別本  
改

第四頁後四行偶能及我為非常按別本能作爾  
第五頁前一行舊楚黃橙綿作瓢刊本綿訛線據  
別本改

第六頁後四行蜀蒔久無味刊本蜀訛獨據別本



改

第八頁前四行書問雖惟為按此句疑訛

卷五十六第七頁前五行馳獻百葩心浥浥按別

本心作光

第九頁前一行味久迴甘竟日在刊本久訛甘據

別本改

第九頁前八行次韻和再拜按別本作次韻再和

卷五十七第六頁前一行我觀欲物際按此句疑

有訛

第八頁後一行廣甸飛甘澤刊本飛訛非據別本


改

第九頁後四行法明而不奇按奇疑苛字之訛

第十一頁後四行始終不改過刊本過訛過據別

本改





總校官庶吉士臣張能照

校對官庶吉士臣戴心亨

校對官編修臣周厚轅

謄錄監生臣瞿秉虔

謄錄監生臣徐掄元

欽定四庫全書

集部

宛陵集卷

五十八至  
六十

詳校官助教<sub>臣</sub>常循



欽定四庫全書薈要卷一萬四千四百九十八

集部

宛陵集卷五十八

宋 梅堯臣 撰

吳長文紫微見過

豈敢以貧賤而輒傲賢貴但恨門闌遙赫日去可畏瘦  
馬汗長流寸步出無謂是以逾十旬景慕腸欲沸近因  
秋雨來纖纖有涼氣九陌可以行輕服可以衣方將事  
請見瘡足痛苦跣忽枉騶騎過顏厚言莫既尚期新醪

熟還往襲經緯乃知君子德曩分替則未

范景仁紫微見過亦謁不遇道上逢之

朝游翔鳳池暮直中書省無由見顏色况乃當畏景退  
朝八月朔因得修造請高閣一何新未歸閭巷靜版刺  
留姓名不遑佇軒屏驅馬返我廬道逢騶從整歛轡莫  
敢行顧望立俄頃還家稚子言有車來炳炳傳是紫微  
人將迴猶引領如何互相乖徒自想形影更待秋風高  
緩步時往省

送王道粹學士知亳州

古者二千石高車駕青驪車前陳曲蓋車後建朱旗金  
鼓鳴兩旁壺漿擁通達所付重威惠所仰撫惇嫠景毫  
實鉅屏往俾國相之國相稱疾還正值民阻饑朝廷急  
恤養選守莫與宜君嘗典海陵政績爲衆推今授輒辭  
命大夫多飛綏屢上不得請飭馭俄輕齎既體堯舜仁  
又答稷卨知八月風漸高木葉將披披郊原棗已剥場  
圃黍可治必期寬賦歛無乃息疲羸何當過苦縣肯暇



觀舊碑

和江隣幾學士畫鬼拔河篇

蒲中古寺壁畫古畫者隋代展子虔分明八鬼拔河戲  
中建二旗觀却前東廂四鬼苦用力索尾棧斷一鬼顛  
西廂四鬼來背挽雙手碓下抵以肩龍頭魚身霹靂使  
持鉞植立旗左偏拔山夜叉右握斧各司勝負如爭先  
兩旁撾鼓鼓四面聲勢助勇努眼圓臂梟張拳擊捧首  
似與暴譁意態全當正大鬼按膝坐三鬼帶韞一執旗

操刀擐囊力指督怒髮上直筋舊纏虎尾人身又踣顧  
疾藥短挺金鉞堅高下尊卑二十四二十四鬼無黃泉  
角錐競強欲何賭曷不各各還荒埏

送制置發運唐子方學士

本以諫諍稱今以財賦用所爲各有能何必於茲重東  
南周萬里海陸竭煮種歛之爲公上豈是與民共民方  
苦久弊將缺太平頌有利得設施無不可抑縱大都守  
繩墨曷異風處縫從來許國心曾未苟祿俸願無輸羨

餘終亦歸侍從

次韻和司馬學士慮囚

縲囚往慮問勤恤意不息猛虎在陷穽挑尾尚求食常  
憂有註誤非罪罹暴迫藹藹萬乘都懂懂四方客一遭  
纖微疊鑑垢莫磨拭是以大君心惟恐橫抵摘前法著  
以律後法編以冊每當炎蒸時獄器用刷滌應無古冤  
血地下化為碧我今因牽吟聊以肝膽瀝刑人皆得辜  
不似尤地脉間歸即解鞍浣手嫌控勒昔言善烹魚必

先漑金鬲願言保兢慎切勿厭此役夜月可留翫清樽  
獨可適一榻寬且平羣動都已寂可用休其勞不休庶  
終夕

和吳冲卿江隣幾二學士王景彝舍人秋興

我謂蓬瀛客清切不畏炎及觀秋興篇無遠此窮閭乃  
知天地大節候無愛嫌寒不為富減暑不為貧添向者遭  
蒸炊靡不同炮燂西風吹雨至涼氣何纖纖霈然沃萬  
物不更畢宿占紈扇捉苦倦盤冰得仍厭蠅癡驅又來

蚊蠅喙猶尖絺衣不復浹醅醪壓初甜客有憎壁蝨

吳詩

客有困靴襜

江詩

一以礫爲喜一以嬾自謙唯有螭頭人

朝立宮殿簷盛誇樓觀高又極星斗瞻

王詩

予慙異羣公

歸意如陶潛自念菊將折復思未可鎌春禾作釀熟獨  
邀影與蟾此樂雖易有彼榮安得兼

送覺上人歸湖州

富相國與紫衣

古寺一盂飯弊衣三歲塵相應維帝祝子已得袍新范  
叔復何望原生甘自貧歸看五湖上終有泛舟人

送閔郎中知池州

一送池陽守頗懷當日遊青山臨岸盡翠水入江流楚  
舊茅爲貢燕來鴈報秋牧之登覽處故事待君脩

和吳冲卿學士省中植菊

園菓已熟實未墜野卉已老葉未瘁菊叢是時方發榮  
潭上籬邊俱有爲一從潭島輔長年一自籬根圖暫醉  
今將移近省中蘭壅培早與陶潛異黃土肥濃沃井泉  
朱欄屈曲侵堦地勁風不到何動搖清露能霑誰著意

省省重九各登高金藥滿頭無所忌及此頻邀同舍歡  
向來莫羨鍾繇賜我家蓬藿不足云強對嘉章顏起愧  
張仲通追賦洛中雜題和嘗歷覽者六章

伊川

山斷瀉伊流灘聲朝暮急東渡馬將登西堤人已立日  
省東西舟爭途如不及誰見捕魚郎寒蓑雨中濕

洛州

上陽宮樹影不隨寒波流天津橋下石激響無時休至

清自照物遇險豈能柔東過白馬去凡經幾千秋

潛溪

寒溪隨山迴脩竹隱深寺頗逢老僧談能憶先朝事白  
枯聖君憐緋花土人時不到三十秋依稀猶可記

真宗嘗駐

蹕白枯樹下花譜  
有潛溪緋一品

石樓

山腰古石樓杳藹石梯上低窺巖際樹對見龕中像簷  
中嵩雲飛檻逼伊湍響同遊已零落歲月成俯仰



大樹寺

庭中兩大樹池上千竿竹竹有紅淚斑樹無衆鳥宿昔  
日白傳歸愛吟裴令續閒流水西園翻然入他族

蘄竹

顚肥節腦瘦蘄水長笛材洛陽袁氏塢此竹舊移來雪  
霰飽已久竅星誰爲開與君作龍吟吹發江南梅

次韻任屯田感予飛內翰舊詩

二十四年君日哦翰林風韻郢中歌歲華荏苒都如昨

世事升沉亦苦多，燕國駿蹄猶待樂。  
荆山美寶已逢和，賸求海內多何用。  
爛醉人間理莫過，歷覽昔賢皆泯泯。  
尋思魯叟自波波，我今不敢希高躅。  
蹇步年來任跌跣，次韻答德化尉郭功甫遂以送之。

江南有嘉禽，乘春弄清吭。  
流音入我耳，慰愜若獲貺。  
朝聽已孤高，暮聽轉幽曠。  
何多燕雀羣，聲跡不相傍。  
始聞汾陽生，文行衆所諒。  
獨哦青山間，悼古或悲愴。  
棄官不屈人，頗學陶元亮。  
是時予愛之，顏采莫得望。  
倏然能見

過遠涉丹湖浪袖携一卷詩行橐更無長固與俗人殊  
於焉識敦尚嗟嗟二千石不知子所向駭子發論高萬  
仞聳孤嶂又如決河湍捧土安可障吾方歎瓌材恨未  
逢良匠信哉騏驥駒誰用伯樂相自從昔還朝汨汨走  
俗狀未嘗寄子書子言今行行亦似昧相知曾非事高  
閑把筆誠不勤強意乃為妄茲晨去湓城聊以和子唱  
子辭猶瀑布敢挹不知量

送李師錫太博通判懷州

洛陽古道登北邙河內碧山橫太行朝騎快馬暮可到  
風物人心皆故鄉竹林無蹤懷阮籍路傍有冢嗟宣王  
別乘差同二千石教民唯在親耕桑

送潘士方建昌

軍壘近僊山麻源第三谷靈運詩亦存魯公記可讀幸  
時無寇攘閑日望雲木儻見西王母白鱗如白鹿來尋  
鳥爪人神光生石屋無念癢背搔還恐罹怒扑學道我  
未成鍊氣不飽腹安得羽翼生下上同黃鵠送君想君

遊星斗壇邊竹

次韻和吳仲庶舍人送德化郭尉

蒲葉高帆十二幅  
秋風逆水滿檣開  
是時不畏浪頭起  
到日定將船尾堆  
用舍東方言虎鼠  
賤疎梅福比蒿萊  
少年才辨無如美  
廬岳峰前莫滯迴

和劉原甫舍人樂郊詩

太守東平來固殊  
阮步兵步兵醉乘驢  
太守整佩纓事  
物既已遺駕車出  
東城園荒久不治  
道路生棘荆地僻

人馬入草間。狐兔驚舊池堙。猶窳遺址歸不平。窳者使  
之瘠。歸者使之營。博野高榭起陳漁。危臺成榭前東山。  
秀臺下。盧泉清。傍塢梧竹密。翳水芹藻并。渠渠有深堂。  
燕賓飛玉觥。芍藥廣陵美。謔贈鄭女情。公子莫言歸。古  
人未以輕。欲知學山簡。倒載去歌傾。

送張聖民學士知登州

慕君才行美風義。亦倜儻在遠恨。未逢既近不屢往。非  
以近爲輕。恃易遂成曩。倏爲東牟守。別我駐征鞅。又作

千里遙依然復懷想昔聞之杲山秦碑元有兩一存東  
頂中一在西頂上篆實丞相斯缺剝不可做願言試歷  
覽聞見欲以廣海晴望石橋神僊事懞恍始皇安得長  
陰怪役罔象橋斷水無涯焉知有方丈邇者地出金發  
掘懷沃壤良民皆逐末茲事誰用長凡爲二千石唯在  
勸耕紡幸君經術高教化人所仰

送王言秀才歸建昌

來時槐開花去日木墮葉作賦未得薦著書已盈篋舊

居近僊壇獨往遇農饁莫問鳥爪人欲取月桂捷

次韻和劉原甫遊樂郊贈同遊

積歲阻顏色何以慰我思聞初遊樂郊頗慕登望詩下  
車未幾日倏見白露滋月弦不常滿星畢屢已離幸無  
風雨晦時從寮采嬉大喜酒客難莫顧尚書期獨守詩  
書愚未悟朝夕疲引領君子風東首自忘移但當觀魚  
鳥辟去旄與麾優悠民亦康何必苦吏爲

次韻和王尚書答贈宣城花木瓜十韻



百菓各甘酸或由人所植木瓜聞衛詩贈好非玉色投  
此瓊玖報蓋重車馬飾貴賤今既殊凌紙字翕艷一一  
如明珠自得見安格復何備國風庶亦見王澤捧之爲  
重賜誦已乃忘食幸資藥品用少助宣調力南土加文  
章中州異肥瘠公將和鼎餽微意願尋繹

九月晦日謁韓子華遂留邀江隣幾同飲是夕值  
其內宿不終席明日有詩予次其韻

乘興驅車偶一來旋呼江老舊遊陪驚風送雨寒初動

舉酒浮蛆撥不開  
騏驥韝時聞內宿琵琶彈  
急怨虛催接羅帶去  
令傳樣自此逢歡未便迴

送王省副寶臣北使

紫服黃金帶銀鞍翠錦韉  
犯寒辭漢省持禮入胡天  
左衽通華語名王接右賢  
舊山迴可記碣石與燕然

送李學士公達北使

萬里使窮域山川入馬蹄  
馳鳴沙水凍鵬擊雪雲低  
食飲羊兼酪供迎虜雜奚  
禮成迴近日喜聽早朝雞

送祖擇之學士北使

燕山常苦寒漢使涉窮臘路長人馬愁風急沙霰雜宿  
造氊廬開行逢獵騎合獻鮮禿髮馳問譯華言答每食  
冰生盤欲飲酒凍榼見其酋長時國禮何勤納中朝厚  
仁恩四海望閭闔乃知日月光照必蠻夷匝歸來易輕  
裘賜對延英閣

送許璋監簿歸泰州

木枯鳥不巢泉涸魚不游我非魚鳥情貧縛路阻脩高

陽有令子嗣世學已優前日來京城問恤忍涕流今失  
王府薦命奇言非讐家聲喜未墜辭我還海陬爲酌一  
壺酒叙懷心如抽子之伯父歿遣奠固莫由豈欲寡恩  
義力薄難置郵因寄緣睫淚灑向君衣裘

送棣州唐虞部

人持左符去馬逆北風行古路草初白大河冰未成暖  
科桑柘美寒織杼梭鳴風俗已如此憇棠無訟爭

金陵有美堂

李白愛山如洛陽三盃爲歌愁日長廢基臺殿不可識  
玉燕舊樓王謝堂公來碧瓦起棟宇羅列圖畫牙作牀  
池頭古月城下江照見萬里冰雪光江流不盡月不死  
寒浪素影東西翔願公樂此殊未央慎勿區區思故鄉  
送張中樂屯田知永州

畏向瀟湘行不入洞庭去鞍馬踏關山衣裘冒霜露零  
陵三千里楚俗未改故王澤久已覃國刑亦當措皆聞  
柳宗元山水尋不飫其記若丹青因來問潭步石燕飛

有無香草生觸處僊姑異麻姑歲月樓中度不食顏渥  
赭言語神靈預莫將車騎喧獨往探幽趣有信報我知  
惡欲驅塵慮

宛陵集卷五十八

欽定四庫全書薈要卷一萬四千四百九十九

集部

宛陵集卷五十九

宋 梅堯臣 撰

陽武王安之寄石榴

安榴若拳石中蘊丹砂粒割之珠落盤不待鮫人泣舊  
友大河濱作宰寔畿邑嚴霜百果熟爲贈忽我及始時  
童稚嬌爭取猴猿集老夫所食微何暇更收拾聊答君  
意勤作詩恨短澁



寄致仕余少卿

仕苦戀朝廷多爲老所逼朝廷雖愛賢不欲竭其力君  
歸頗得宜湖上遂偃息男能智自謨孫亦俯就職人事  
當置之自可樂胃臆

和吳冲卿學士冬日私居事

人知何晏宅近住白楊頭車馬不還往詩書多蓄收風  
庭吹落葉霜樹立鳴鳩頗與市朝遠閉門凡幾秋

和吳冲卿藏菜

霜前收美菜欲以禦冬時備乏且增品挑新那復思  
菖菹嗜西伯薑食語宣尼未免效流俗競將罌盎爲

依韻和王景彝學士紫宸仲冬早謁

朝開閭闔九重深望拜珠旒照玉簪霜氣稍迴龍陛峻  
日光微轉鳳樓陰庭中細仗穿旗脚案外薰爐對殿心  
我預千官少裨補欲將歌頌播堯音

依韻和景彝謝予訪其居

日暮乘羸馬因過太史家竹窻談脫塵槐樹暝栖鴉邦

瘁稽前詠人亡起彼嗟夜分歸不寐猶照角巾斜

其日聞石

昌言

卒

哀石昌言舍人三首

十一月二日

朔日望顏色衣冠朝帝閣西靈未生魄東岱已收魂  
弔哭新居啓封題舊篋存善人吾不見何可問乾坤

聖賢無不死壽夭復何云唯有名常在其餘理莫分朝  
榮金玉寶暮殞蕙蘭焚今日寢門哭緒言長絕君

賈誼過秦畢相如諭蜀歸二人名既大一日命何微瘡

似鳥常渴災成鵬不飛百年今已矣冰結淚霑衣

鄭州王密諫漱玉齋

渠渠梁照日泯泯水分京激作飛巖勢流爲雜佩聲圖  
書無近蹟草樹有冬榮景落人間處漂花出古城

書李學士北使集後

蘇武艱窮只四篇五言風格到今傳節旄零落都無詠  
枉在胡中十九年

送李學士河東轉運

重持使者節北上太行行未注螭頭筆來賙塞下兵朱  
轡邦伯至黃綬縣官迎臘雪臨關密宵烽出堠明山川  
壯汾晉戎馬說幽并此部多才俊其人不見輕

次韻和吳仲庶苗蔡二君村墅閒居

聞說江南庾子山卜居泉石愛孱顏古來得喪何須問  
世上榮枯只等閒高闕浮雲徒有戀夕陽飛鳥亦知還  
予貧不及三君子老愧朝紳進退間

送良玉上人還崑山

來衣茶色袍歸變棋色服孤舟洞庭去落日松江宿水  
煙晦琴徽山月上巖屋野童遙相迎風葉鳴橡櫺

依韻和宋次道學士紫宸早謁

陸生聲譽在雲間來預簪裾謁帝顏冠劍有容夔與高  
文章全盛馬兼班耽耽玉宇龍纏棟藹藹金鋪獸鬣環  
却出常衙殿前過戟衣風動自相攀

和次道省中初直

江南太守歸夜直省中闌霜氣冷侵被月光斜入扉官

奴休執燭侍史正薰衣展轉不成寐幽懷吟更微

去年宋中道自洺州以書令魏殊來謁予魏遂託  
主第後辭歸予因中道之兄次道有孔雀賦以送  
魏生

置從南海枕榔林籠入西州鸚鵡地聳冠翕翼脩尾張  
鱗鱗團花金縷翠一身粲爛文章多引聲笙竽奈遠何  
五侯池館不可戀桂樹深枝自有窠鳳凰樓頭饒燕雀  
入屋穿簾非爾樂非爾樂去何之北方佳人或歌嘯

依韻和宋中道見寄

歲在涪灘初別子子趨廣平裨郡理廉頗臺傾有遺址  
今逢四方弓久弛時不用兵皆樂鄉念我貧居天子庠  
抱經臨案空循行貌垢不洗顏蒼蒼得時少壯相揄揚  
獨行無侶心萍浪腸如輓轡轉井牀內饑外寒膚粟芒  
若此煎炒何心腸王都浩浩多球琅懷珉安可爭焜煌  
舊朋升騰皆俊良歿不發語生括囊巍巍堯舜開明堂  
大調金石來鳳凰鴛鴦戢翼方在梁福祿其宜無不臧



已甘老死填溝隍殭尸闔棺猶目張仲尼生世尚惶惶  
豈能強聒爭蹌蹌未由見子舉以觴北望大河衣袂攘  
牽牛橫漢不服箱欲往乘車無可當天駟有星名曰房  
又欲乘馬行幽荒牛雖蹄瑩馬眼光既不我駕路阻長  
我懷炳炳何日忘半夜攬琴彈履霜寫意緘辭無鴈將  
低雲作雪正蒼茫

雷逸老以做石鼓文見遺因呈祭酒吳公

石鼓作自周宣王宣王發憤蒐岐陽我車我馬攻既良

射夫其同弓矢張舫舟又漁縛鱣魴何以貫之維柳楊  
從官執筆言成章書在鼓腰鐫刻藏歷秦漢魏下及唐  
無人着眼來形相村童戲坐老死喪世復一世如鳥翔  
唯閱元和韓侍郎始得紙本歌且詳欲以氍毹衣歸上庠  
天官嬋阿駝肯將傳至我朝一鼓亡九鼓缺剝文失行  
近人偶見安碓牀亡鼓作臼剝中央心喜遺篆猶在傍  
以曰易曰庸何傷以石補空恐春梁神物會合居一方  
雷氏有子胡而長日模月倣志莫強聚完辨舛經星霜

四百六十飛鳳凰書成大軸綠錦裝偏斜曲直筋骨藏  
携之謁我巧趨蹌我無別識心傍惶雖與乃父非故鄉  
少與乃父同盃觴老向太學鬢已蒼樂子好古親縑緗  
誰能千載師史倉勤此冷淡何肝腸而今祭酒裨聖皇  
五經新石立兩廊我欲效韓非癡狂載致出關無所障  
至寶宜列孔子堂固勝朽版堆屋牆然須雷生往度量  
登車裹護今相當誠非急務煩紀綱太平得有朝廷光  
山水大字輦已嘗於此豈不同粃糠海隅異獸乘舟航

連日道路費芻糧又與茲器殊柔剛感慨作詩聊激昂  
願因諫疏投皂囊夜觀奎壁正吐芒天有河鼓亦焜煌  
持比負鼎干成湯

和宋次道奠石昌言舍人

金羈白馬曉朝天嘒管行車暮已傳上帝樓成何遽召  
青霄路絕不應還飄階隕葉聲淒若隔幕孤燈夜寂然  
來奠一觴空湛湛却思平昔淚漣漣

和王景彝寄呂縉叔

白盡髭鬚更未成不如能賦易登瀛三冬足用腐儒飽  
千里從看跛鼈行知有清名在公議自無餘力到高閑  
磻溪八十猶垂釣祖例推來亦後生

依韻和宋次道答第中道喜還朝

白首謬陪兄弟間阿連初喜客兒還池塘夢句君能得  
咳唾成珠我未閒陋巷閉門誰扣扣茂林飛鳥自斑斑  
歸來又接同袍會月下朱闕不用關

依韻和答王安之因石榴詩見贈

當年仕宦忘其卑朝出飲酒夜賦詩伊川嵩室恣游覽  
爛熳徧歷焉有遺是時交朋最爲盛連值三相更保釐  
謝公主盟文變古歐陽才大何可涯我於其間不量力  
豈異鵬搏蒿鷃隨見君弟兄入太學俊譽籍籍聞一時  
而今兩鬢各已白偶因贈酬言及斯升沉是非休要問  
百歲歡樂誰能期

陽武王安之寄兔魚

原上一雙兔河中兩尾魚兔皮空被褐魚腹不藏書長

跪置遠意故人情何如二物本潛伏誰言罝網疎崢嶸  
歲亦晚將駕歸吾廬

依韻和王景彝對雪

天雪霰成先暴集地中陽復已如期穿林斗覺縈風急  
入袖初驚學舞遲樓上溫貂方貰酒竹間寒雀未辭枝  
平明君向螭頭立玉座爐煙細細時

依韻和答永叔洗兒歌

夜夢有人衣帔蛻水邊授我黃龜兒

生男前一夕夢  
道士贈龜一枚仰

省星宿正離離玉魁東指生斗威明朝我婦忽在蓐乃  
生男子實秀眉自磨丹砂調白蜜辟惡辟邪無寶犀我  
慙暮年又舉息不可不令朋友知開封大尹憐最厚持  
酒作歌來慶之畫盆香水洗且喜老駒未必能千里盧  
仝一生常困窮亦有添丁是其子

重送祖擇之北使

文章世德已能傳得桂高枝二十年持節欲同蘇武勁  
下帷曾似董君賢衣裘衽領無嫌左飲食盃盂暫厭羶



一過范陽應感慨歸來圖畫彼山川

題老人泉寄蘇明允

泉上有老人隱見不可常蘇子居其間飲水樂未央淵  
中必有魚與子自徜徉淵中苟無魚子特翫滄浪日月  
不知老家有雛鳳凰百鳥戢羽翼不敢言文章去為仲  
尼歎出爲盛時祥方今天子聖無滯彼泉傍

景彝率和唐崇徽公主手痕詩

兩壁美人虹已收蒼崖纖手蘚痕秋和親只道能稽古

沉略從來不解羞漢月明明掌中照胡塵漠漠指間留  
昭君歿後更多恨彈作琵琶曲未休

觀黃介夫寺丞所收丘潛畫牛

丘畫吳牛希戴嵩吳牛角偃灣如弓老牯望犇犢望母  
母下平坡離牧童牧童吹笛坡頭坐古樹蕭騷葉戰風  
黃君買畫都城中不惜滿貫穿青銅賣從誰家不肖子  
傳自幾世賢卿翁今時貴人所尚同競借觀玩題紙窮  
紙窮石落見墨妙東府西樞三四公應識古人丹青蹟

又辨古人於物通一毛一尾不取次豈以後代為盲聾  
願推此意佐國論况乃聖德同堯聰

題嘉興永樂院携李亭

土化吳王甲骨朽越王兵五月菖蒲草千年携李城蒲  
根蛙怒嚎城上烏夜鳴吳越滅已久客心空屏營落日  
孤亭間悠悠鐘磬聲

吳冲卿鼓契

猶是唐時契有司  
嘗欲易之上不許

暮契出朝契歸出入未嘗逢日暉雄雌曾不離鍾室百

年刻弊知者稀時移世異不改易俗眼厭舊君前非君  
王萬年千年壽獨憐古器與衆違昨日霜華厚如雪百  
官凍靴朝紫微吳君偷就溫漏火始一識之增歎唏不  
知逢逢六街鼓自此發號通帝闈人間鐘鼓有多少多  
少亂鳴誰肯譏

江隣幾寄羊羝

去歲爲  
翊造者

細肋胡羊卧苑沙長春宮使踏霜羝蒺藜苗盡初蕃息  
苜蓿盤空莫嘆嗟自乏良謀甘更鄙猶能大嚼快無涯

磨刀為削朝霞片時引清盃興轉嘉

周仲章都官示卷因以贈之

赭白西北來本是天馬種朝秦暮至吳  
嵩華如歷冢伯樂曾未逢垂頭牧青隴  
今朝顧我鳴振鬣耳聳聳聲生秋風悲已  
喪荆軻勇誰牽駕鸞車高躡雲勢擁

宛陵集卷五十九

欽定四庫全書薈要卷一萬四千五百

集部

宛陵集卷六十

宋 梅堯臣 撰

覽翠亭記

郡城非要衝無勞送還往官局非冗委無文書迫切山  
商征材巨木腐積區區規規襲不為宴處久矣始是太  
守邵公於後園池傍作亭春日使州民遊遨予命之曰  
共樂其後別乘黃君於靈濟崖上作亭會飲予命之曰

重梅今節度推官李君亦於廨舍南城頭作亭以觀山川以集嘉賓予命之曰覽翠夫臨高遠眎心意之快也晴澄雨昏峯嶺之顛也心意快而笑歌發峰嶺明而氣象歸其近則草樹之煙緜溪水之澄鮮銜鱗翻來的的有光掃黛侍側嫵嫵發秀有趣若此樂亦由人何則景雖常存人不常暇暇不計其事簡計其善決樂不計其得時計其善適能處是而覽者豈不暇不適者哉吾不信也

林和靖先生詩集序

天聖中聞寧海西湖之上有林君蘄蘄有聲若高峰瀑  
泉望之可愛即之逾清挹之甘潔而不厭也是時予因  
適會稽還訪於雪中其談道孔孟也其語近世之文韓  
李也其順物玩情爲之詩則平澹邃美讀之令人忘百  
事也其辭主乎靜正不主乎刺譏然後知趣尚博遠寄  
適於詩爾君在咸平景德間已有大聞會天子脩封禪  
未及詔聘故終老而不得施用於時凡貴人鉅公一來



相遇無不語合慕仰低回不忍去君既老朝廷不欲強起之而令長吏歲時勞問及其歿也諡曰和靖先生先生少時多病不娶無子諸孫大年能掇拾所爲詩請予爲序先生諱逋字君復年六十一其詩時人貴重甚於寶玉先生未嘗自貴也就輒棄之故所存百無一二馬嗚呼惜哉

紅鸚鵡賦

并序

相國彭城公尹洛之二年客有獻紅鸚鵡籠之甚固復

以重環繫其足遂感而賦云

蹄而毛翼而羽以形以色別類而聚或嘯或呼遠人而處在鳥能言有曰鸚鵡產乎西隴之層巒巢於喬木之危端其性惠其貌安與禽獸異爲籠檻觀吾謂此鳥曾不若尺鷃之翻翻復有異於是者故得以粗論吾昔窺爾族喙丹而綠今覽爾軀體具而朱何天生爾之乖耶俾爾爲爾類尚或弗取况爾殊爾衆不其甚與何者徒欲謹其守固其樞加以堅鑲置以深廬雖使飲瓊乳啄

彫胡以充饑渴鑄南金飾明珠以為關閉又奚得於烏  
鳶之與雞雛吾是知異不如常慧不如愚已乎已乎

述釀賦

少居楚鄉楚多釀者故埏識酒之然夫酒之作也必良  
其器必香其泉法式具舉酸敗罕旃取有豐約味有醲  
泊則曰聖曰賢和神懌氣積日彌年自時厥後茲道寢  
墮昔飲其醇今飲其醖昔也熙熙終日不亂舒暢四肢  
今也冥冥迷魂倒魄不知其醒吾觀於世未始達此夫

以天下為壚，爨兆庶為梁。米君臣為麴，藥道德為酒醴。  
酣仁漱義，四海薰和。莫知所以逮乎率土，澆弊材不授  
矣。君臣乖異，法不施矣。道德遂薄，酒弗飴矣。鋪詐啜偽，  
昏然而無歸矣。安得滌其具，更其術，時其物，清其室，然  
後漬以椒桂，侑以橙橘。吾將霑醉乎窮日。

靈鳥賦

鳥之謂靈者，何噫？豈獨是鳥也？夫人之靈大者，賢小者，  
智獸之靈大者，麟小者，駒蟲之靈大者，龍小者，龜鳥之

靈大者鳳小者鳥賢不時而用智給給兮為世所趨麟  
不時而出駒流汗兮擾擾於脩途龍不時而見龜七十  
二鑽兮寧自保其堅軀鳳不時而鳴鳥鷦鷯兮招唾罵  
於邑間烏兮事將兆而獻忠人反謂爾多凶凶不本於  
爾爾又安能凶凶人自凶爾告之凶是以為凶爾之不  
告兮凶豈能吉告而先知兮謂凶從爾出胡不若鳳之  
時鳴人不怪兮不驚龜自神而剝殼駒負駿而死行智  
驚能而日役體劬兮喪精烏兮爾靈吾今語汝庶或

汝聽結爾舌兮鈐爾喙爾飲啄兮爾自遂同翔翔兮八  
九子勿噪啼兮勿睥睨往來城頭無爾累

南有嘉茗賦

南有山原兮不鑿不營乃產嘉茗兮囂此衆氓土膏脉  
動兮雷始發聲萬木之氣未通兮此已吐乎纖萌一之  
日雀舌露掇而製之以奉乎王庭二之日烏喙長擷而  
焙之以備乎公卿三之日槍旗聳蹇而炕之將求乎利  
羸四之日嫩莖茂團而軌之來充乎賦征當此時也女

廢蠶織男廢農畊夜不得息晝不得停取之由一葉而  
至一掬輸之若百谷之赴巨溟華夷蠻貊固日飲而無  
厭富貴貧賤不時啜而不寧所以小民冒險而競鬻孰  
謂峻法之與嚴刑嗚呼古者聖人爲之絲枲締綌而民  
始衣播之禾麴菽粟而民不饑畜之牛羊犬豕而甘脆  
不遺調之辛酸醎苦而五味適宜造之酒醴而譙饗之  
樹之果蔬而薦羞之於茲可謂備矣何彼茗無一勝焉  
而競進於今之時抑非近世之人體惰不勤飽食梁肉

坐以生疾藉以靈薈而消腑胃之宿陳若然則斯茗也  
不得不謂之無益於爾身無功於爾民也哉

### 鳴鳩賦

時人謂鷦鷯癡拙禽也茲禽然癡且拙猶能以喙寫心  
布於辨音者焉曰我智不如燕鴈識氣候之蚤晚隨陽  
而來知社而返勇不如鷗鷖鷹鷂恣搏擊於秋天下無  
全物落不空拳惠不如鸚鵡鸚鵡入宗堂兮蔭夏屋事  
言語以如人餌菓梁而飫腹巧不如女匠挂巢室於枝



上畏風雨之漂搖，紕茅莠而密壯年，不如鶴鶴繫羽毛。  
於寥廓希霖雨而鳴埴，和氣類而靡爵茲五者，實無有  
於羣鳥。分馴馴於林表，癡亦誠多拙，亦不少。雖不能趨  
暄暝之時，亦毛翮而自持。雖不能決爪吻之利，亦飲啄  
而自遂。雖不能美喉舌之辯，亦呼鳴而自善。雖不能理  
窠之完，亦棲處而自安。雖不能適變赴情，亦隨宜而自  
寧。噫，唯癡與拙，天之所生，若此而已矣。又烏足為之重  
輕。

麀尾賦

野有壯麀兮罹虞人於廣原其身已殺其肉已燔其骨  
已棄獨其尾之猶存飾雕玉以爲柄入君握而承言聊  
指麾之可任雖脫落而蒙恩噫譬諸犬豕其死則均其  
肉與骨亦莫逡巡自古及今若此泯沒者日有億計曾  
不一毫以利人是以生若蚍蜉死若埃塵生無以異於  
其類死不爲時之所珍故仲尼疾沒世而名滅子長亦  
著論而有因乃感茲獸而用告乎朋親

擊甌賦

余觀今樂愛乎清越出金石之間所謂擊甌者本埏埴  
異琳球入伶倫兮間齊優其可尚者鳴非瓦釜律度合  
鼓非土缶音韻周和非埙箎上下應作非鐘磬節奏侔  
而又冰質瑩然水聲脩然度曲泠然入耳瀏然猶有非  
之者曰善則善矣未若艷女之歌喉何則是謂絲不如  
竹竹不如肉以其近自然之氣况此曾何參於樂錄之  
目乎余辨之曰融結合於造化堅白播於陶鈞發和於

器導和於人可以樂嘉賓可以暢百神安得絲竹謳吟之匪倫也哉

哀鷓鴣賦

并序

余得二鷓鴣飼之甚勤既久開籠肆其意其一翩然而去其存者特愛焉鷓鴣於禽最有名頃未識也思持歸中州與朋友共玩之凡養二年呼鳴日善罷官至蕪湖一夕爲鼠傷死遂作賦以哀云

物有小而名著亦有大而無聞吾於禽類得鷓鴣兮不

羣其音格磔其羽爛斑其生遐僻其趣幽閑飲啄乎水  
裔棲翔乎竹間往咨羅者求之於野生致二雛形聲都  
雅愛之蓄之籠之服之為日已久言馴熟兮縱睇朝旭  
一逸而不復兮謂之背德非我族兮戀而不去尤可穀  
兮晨啼暮宿何嗟獨兮固當携之中國為士大夫之目  
兮不意孽鼠事潛伏兮破笈嚙嗉何其酷兮嗚呼翻飛  
遠逝不為失兮安然飽食不為福兮焉知不為名之累  
兮焉知不為鬼所瞰而禍所速兮哀哉誠不如禿鷄鶡

鵬兮凡毛大軀妖鳴飫腹何文彩之佳何名譽之淑前  
所謂大而無聞其自保而自足者與

問牛喘賦

和人鄧  
州六首

客有感前史問牛喘廣而賦義有由余得據遺辭掇遺  
韻索遺意而用以酬夫寒為冬燠為夏和為春肅為秋  
和以發生則物萌而抽燠以長養則物盈而周肅以登  
就則物實而收寒以閉結則物藏而休是則陰陽之道  
順而燠和之職脩若乃當春而燠是為行夏令而火侵

於木時則有雨水不降草樹早落火訛相驚疾疫多作  
故丞相當是月而見牛喘恐天令之愆錯問從來之遠  
邇兮或力或曠而可度匪賤人而憂畜實原微而意博  
所以元化日調萬彙時若及其後世我自我物自物天  
自天人自人胡為乎冬胡為乎春孰謂差忒孰謂平均  
曰吾委佩而端冕服美而食珍上奉天子下役蒸民夫  
何預於我哉我亦無愧於茲辰

凌霄花賦

厥草惟夭厥木惟喬草有柔蔓木有繁條緣根兮附質  
布葉兮敷苗朱華粲兮下覆本榦蔽兮不昭嗟乎此木  
幾歲幾年而至於合抱夫何此草一旦一夕而遂曰凌  
霄是使藜藿蒿艾慕高豔而仰翹翹也安知蘋藻自潔  
蘭蕙自芳芙蓉出汗而自麗芝菌不根而自長或紉珮  
帶或采頃筐或製裳於騷客或登歌於樂章故得為馨  
為薦為嘉為祥皆無附著亦以名揚奚必托危柯而後  
昌吾謂木老多枯風高必折當是時將恐摧為朽菱不



復萌蘖豈得與百卉並列也耶

矮石榴樹子賦

并序

襄城縣庭下生矮石榴往來者異之予作賦寫其狀因以自勵云

有矮石榴高倍尺中訟庭麗戒石訪諸走胥云非封植忽此生榮三傳歲歷密葉如蓋繁條如織萎蕤下垂疲軟無力絀苞貯露累累仄仄下人俯視顛本可識雀愧卑棲而不肯集兮故啾唧以矯翼偃偃盤盤若屈若鬱

紉紉結結非曲非直榦不足攀陰不足息夫何挺質之  
可惑耶意為異與為妖與人以為異我不知其異曰殊  
衆人之類類人以為妖我不知其妖曰乖衆木之翹翹  
然而不生樊圃臺榭遊觀之所產茲堂下其有以警而  
有以覩因形狀義庶將有補當華蔓衍之多枝無若輒  
柔之不舉勿俾苞苴之流行勿使吏氓之輕侮勿渙恣  
以自抑勿猶豫而失處勿闢茸以接卑勿上下之不撫  
夫如是則異也妖也固弗取維戒懼斯主

風異賦

井序

庚辰歲三月丙子天大風壬午詔出郡縣繫獄死罪已  
下夫風者天地之氣也猶人之呼噓喘吸豈常哉若應  
人事之變則余不知故賦其大畧云

吾因迺勞適于郊憩亭舍日晡時羣輩外囂曰火來

音

火來喔呼噫噉出屋遠望西北之陲亘天接地混混赫  
赫不見端涯逡巡則赤埃赭霧突盪奔馳陽精失色白  
晝如晦號空吼穴揚砂走塊衆心驚惶廣衢翳昧莫辨

誰何執手相對其少頃也稍明故歸人未寧兮相與而  
為隊順前者措足之不暇逆進者舉武而愈退睇山川  
兮安陳趨城郭兮安在所可視者五六步之內越翌日  
四方恬霽乾坤黯慘物色憔悴牛復馬還絕銜鼻草靡  
木折莢實墜禽鳥墮死泥滿喙几案傾歌塵覆器民廬  
毀壞商車顛躓既而衆曰此何景也伺彼往來兮問遠  
邇之所自或曰起浚都播許鄭歷洛汭以及唐鄧漢隋  
之地稽厥時厥狀無與此土異未迨旬浹德音遐暨是

知本聞之不偽聊綴辭也若此言變咎則非愚者之能議

乞巧賦

孟秋七日夕戶未扃余歸自外見家人之在庭列時花與美果祈織女而丁寧乞天巧之付與惡心手之鈍冥余既寢而弗顧又烏辨夫列星兒女前曰故事所傳餘千百齡何獨守拙迷猶未醒遂起坐而歎曰吾試語汝汝其各聽夫芒忽之間變而有氣氣而有形形而有生

生而有靈愚慧慧自然之經賦已定矣今返妄營則  
何異高山之木今不能守枝葉之亭亭欲戕而為犧象  
兮利塗飾乎丹青且復天巧與人巧將不同也天孫又  
安得此而輒私天之巧者總陰陽運四時懸日月星辰  
而不忒其璇璣鼓雷風雨雪而不失其施生萬物死萬  
物而物得其宜此天之所以任大巧而不虧人之巧者  
非它直心口手足也心巧於慮口巧於詞手巧於技足  
巧於馳亦各有極不可強為故慮之巧不過多智謀使

爾多謀多智則精騫而魄離詞之巧不過多辯言使爾  
多言多辯則鮮仁而行遺技之巧不過多能藝使爾多  
能多藝則藝成而跡卑馳之巧不過多履歷使爾多履  
多歷則速老而筋疲如是則吾焉用而乞之吾學聖人  
之仁義尚恐沒而無知肯乞世間之輕巧以汨吾道而  
奪吾之所持吾決守此而已矣爾勿吾疑

思歸賦

祿有可慕祿有可去何則移孝為忠曾無內顧則祿可

慕而可據上有慈顏以喜以懼故祿可去而不可寓噫  
吾父八十母髮亦素尚爾為吏復焉遐路嗷嗷晨烏其  
子反哺我豈不如鬱其誰訴惟秋之氣至慘慄而感人  
日興愁思側睇江濱憶為童子當此凜辰百果始就迭  
進其珍時則有紫菱長腰紅苋圓實牛心綠蒂之柿獨  
苞黃膚之栗青芋連區烏桕五出鴨脚受彩乎微核木  
瓜鏤丹而成質素乳之梨頰壺之橘蜂螭淹醯楮漬  
蜜膳羞則有鵝鵲野鴈澤鳬鳴鶉清江之膏蠓寒水之



鮮鱗冒以紫薑雜以菱首觴浮茱菊俎薦菁韭坐溪上  
之松篁掃門前之桐柳僕侍不譁圖書在右或靜默以  
終日或歡言以對友信吾親之所樂安間里其茲久切  
切余懷欲辭印綬固非效淵明之褊衷耻折腰於五斗  
蓋自成人以及今未嘗一日侍傍而稱壽豈得不決去  
於此時將恐貽恨於厥後

鬼火賦

放舟於潁水之上夜憩於項城之野陰氣四垂而雨微

下左右望之若無覩者有光熒然明於水邊人皆謂之  
鬼火吾獨未為然焉噫謂鬼為無吾不敢謂之無謂鬼  
為有吾不敢謂之有但觀韓氏之言舊矣曰鬼無形鬼  
無聲既無聲與形又安得此而明嘗聞巨浸之涯百物  
皆能發光而吐輝又草木之腐亦能生耀而化飛爾知  
彼是而此非曰若電者因形乎因勢乎苟因形因勢則  
此何疑而弗及嗚呼昔人有論電者陰陽之氣相薄而  
成何須形勢將就此妄名謂為物光可也謂為鬼火則

吾不敢聽

鬼火後

吾既為鬼火賦客有謂余曰嘗覩舊說鬼火曰燐前人  
有述子何不信言未畢余遽辨曰爾不熟究吾旨耶吾  
豈忽而不知且聞兵死之血久而化之既云血化安有  
鬼為此夫草木之腐固合其宜宜曰物光又豈為過此  
論確如牢不可破尚恐未然更聽吾言彼燐燐者胡可  
以烹煎彼熒熒者胡可以燠暄彼焰焰者胡可以炎上

彼熠熠者胡可以燎原蓋無此並蔓說徒繁客慚忸無  
辭而起余方掩乎衡門

魚琴賦

并序

丁從事獲古寺破木魚斲為琴可愛玩潘叔治從而為  
賦余又和之將以道其事而寄其懷

為琴之美者莫若梧桐之孫枝夫其生也附崖石遠水  
涯陰凝其腋陽削其皮曾亡漫戾而沉實之韻資噫始  
其遇匠氏也有幸不幸焉故未得盡厥宜其於不偶若

陷於夷創中刻鱗加尾及髻髻宛然而魚日擊而椎主彼  
齊衆之律令則聲聞囂爾而四馳粵有好事者竭來睨  
之取為雅器製擬庖犧徽以黃金絃以繁絲音和律調  
乃升堂室嗚呼琴兮遇與不遇誠由於通室始時效材  
雖甚辱兮於道無所失今而決可以叅金石之奏焉無  
忘在昔為魚之日

針口魚賦

有魚針喙形甚小常乘春波來不少人競取之一掬不

重乎銖抄其為針也穎不能刺肌膚目不能穿絲縷上  
不足以附鑿而愈疾下不足以因工而進補以口得名  
終親技女大非膾材唯便鮓滷烹之則易爛貯之則易  
腐嗟玉色之可愛聊用實乎雕俎過此已往未知其所  
處

靈鳥後賦

靈鳥我昔聞爾之忠告人之凶遭人唾罵於時不容覆  
巢彈類驅逐西東余是時作賦以弔汝非來爾困而責

爾聰今也主人悟彈者去豐爾食於太倉置爾巢於高  
樹晨鷄不鳴百鳥爭慕傍睨鳳凰下窺鵙鷺爾於此時  
徒能縱蒼鷹逐狡兔不能啄叛臣之目伺賊壘之去而  
復憎鵙鷺之不親愛燕雀之來附既不我德又反我怒  
是猶秦漢之豪俠遠已不稱昵已則譽夫然吾分足而  
已矣又焉能顧

宛陵集卷六十

謹案卷五十八第六頁前三行能憶先朝事刊本  
朝訛到據文義改

卷五十九第一頁前五行不待鮫人泣刊本鮫訛  
蛟今改

第一頁前六行作宰實畿邑刊本邑訛色今改


第七頁後一行三冬足用腐儒飽刊本腐訛韻據  
別本改

卷六十第二頁前六行其辭主乎靜正刊本主訛



至據別本改





總校官庶吉士臣張能照  
校對官編修臣周厚轅  
謄錄監生臣徐掄元